



南澗甲乙稿卷五

宋 韓 元 吉 撰

七言律詩

送湯丞相帥會稽

淮岸春來罷夕烽
君王奏凱大明宮
守關豈但勤蕭相
分陝猶宜屈召公
綵綬不妨龍袞貴
錦衣真與故鄉同
政成更上平戎略
歸作麒麟第一功

翰墨英名多士先
經綸長策禹方傳
久知燕許文章大
要自臯夔事業賢
曲水蘭亭脩竹外
都門祖帳百花前



去天尺五調元舊肯使邦人借一年
疇昔追風幸執鞭詞場好在筆如椽十年踰驥猶瞠若
晚歲登龍未偶然下客陽春驚白雪何人綠水近紅蓮
尚應九里蒙河潤他日一天今二天

送周承勛赴荆南幕

周南留滯幾年餘筆力追還兩漢初無地寘君羣玉府
因人貽我萬金書未嗟王粲依油幕聊喜安仁奉板輿
夢想風帆轉平楚眼明江樹綠扶疏

送馬莊甫攝幕鄱陽用趙文鼎韻

杖策衝寒不作難弓刀結束笑談間便從幕府清民訟
已佐戎車靖蠶蠻風雪幸無千里路江湖纔隔數重山
金南桃李新開徑屈指春融及早還

送陳天與知徽州

臺閣英名二十年卜居那得便林泉履聲舊振星辰上
諫墨猶存雨露邊欲考治功三輔近且施惠政一州先
黃山看盡須黃閣六月天池更著鞭

送陸務觀得倅鎮江還越

高文不試紫雲樓猶得聲名動九州金馬漸登難避世

蓬萊已近卻迴舟燒城赤口知何事許國丹心惜未酬
歸臥鏡湖聊洗眼雨餘萬壑正爭流

前年邊馬飲江水烽火瓜州一水間正使樓船多戰士
要須京峴作重關平戎得路可橫槊佐郡經時應賜環
把酒賦詩甘露寺眼中那更有金山

送陸務觀福建提倉

觥船相對百分空京口追隨一夢中落紙雲烟君似舊
盈巾霜雪我成翁春來茗葉還爭白臘近梅梢儘破紅
領略溪山須妙語少迂使節上凌風

僕爲建安宰
作凌風亭

送呂令防赴海門宰

五斗由來豈療貧尙應拄笏對秋雲未嗟薄宦來還去
但覺頻年我送君舍北水生思共賞淮南米賤好相聞
白魚青笋平生事愁絕江寒鴈影分
野閣山扉舊卜鄰竹陰花徑每情親舉觴契闊又千里
同社淒涼無幾人濯濯未妨如月柳悠悠真不奈風塵
海門應去蓬萊近我欲乘桴試問津

送趙蕃辰州司理

字昌甫

故家零落眼中稀歲月崢嶸踏路岐詩解窮人君莫恨

錢能使鬼我方知片言折獄非無日談笑封侯會有時
一上梅山弔槃瓠賸題佳句寫幽思

送張幾仲知泰州

紫橐甘泉不願留虎符聊試海邊州長城底用騎圍鐵
下瀨直須船有樓草木已應知世望江山好在得詩流
春風桃李西溪路宣室歸來尚黑頭

送施徽州二首

御史英名世罕儔峩冠聊復漸承流治功要自先馮翊
大惠何妨始歙州野媪定知還去虎山民從此罷賣牛

二事見唐劉贊崔元亭任歙州刺史百年善政須公繼尺一書頒願少留

江出新安見底清黃山高勢碧崢嶸袴襦會遣民皆有
枹鼓懸應夜不鳴蠟屐未須懷別墅虎符今喜得名城
他時一榻容徐穉端共輿人樂政成

送李子永赴調改秩

逸驥騫騰十二閑追風那復駐轅問向來官況誠留滯
此去詩情記往還會課未妨更美秩趣班聊喜近天顏
荆雞莫費千牛刃奏賦金門入道山

送王德和赴調改秩

樽酒盤蔬語夜闌三年猶得幾追歡海棠半折春方好
楊柳都青社正寒籌畫定應瞻武帳文華端合侍金鑾
割雞底用磨天刃遲日湖山滿意看

送葉夢錫赴荆南

南郡開邊古上流君王側席用嘉謀壯懷何止入雲夢
雄略行看半九州風勁輦聲連岸動雪晴江影與天浮
一樽莫作新亭語勲業歸庸尙黑頭

送韓子師守婺州

功名相望十年前白首官曹僅接聯良玉要須更九火

明珠那得闕重泉清風遂作雙溪詠老手懸知劇郡便
奏課不妨聊第一歸來更著祖生鞭

送沈千里教授邵陽

穀紋江畔得君詩俊逸清新字字奇一笑偶成歸妹約
幾年還見外孫辭橫經絳帳地雖遠給劄金門天未遲
痛飲離騷吾事爾湘山風物與春期

送潘元夙教授欽州

字子春

文筆超然自不羣胸中韜略未全陳詎應遠教嶺南士
會見來清塞北塵桂海接天聊縱目火雲堆露正關身

元戎在昔同科彥一鶚飛書上紫宸

桂帥王舍人亦中兩科

送澤赴新塗尉

少年薄宦幾東西送汝臨岐意向迷
作尉未嗟官職小致身當與古人齊
短篷載雪看梅蘂古驛衝風信馬蹄
爾父漸衰吾已老寄書時一到南溪

送李直剛鹽官縣尉

蚤接君家大父遊迺翁幕畫尚淹留
文華遂見諸郎秀名宦懸知異日優
朝雨拍溪梅正熟晴雲烘路麥初秋
渭南自昔多賢尉官近長安不用愁

送元修歸廣東

十年門戶苦彫零屈指天涯幾弟兄
羈旅可堪懷世事典型誰與振家聲
驚心朔岸秋風急極目南溟瘴霧橫
好過貪泉未應酌少年游宦要冰清

送沈駒甫

官曹邂逅得情親一賦松齋遂絕塵
天祿校書元有路甘泉第頌可無人
江山興味不知老芋栗生涯未覺貧
我欲邀君寺南住春風聊與杏花鄰

送孟婿植還臨川

西風同泛婺江船，倒指光陰六換年。秋色又看梧葉老，
離懷還對菊花前。塵埃左宦空搔首，功業青雲更著鞭。
兒女關情易來往，一樽臨路亦悽然。

送郭誠思歸華下

忘懷物外且如愚，何事勞精據槁枯。以馬喻馬卽非馬，
數輿無輿方得輿。莫執斧斤過櫟社，懶施几席向蘧廬。
好歸玉秀峯前座，閑看晴雲自卷舒。

依韻和御製秋晚曲宴詩

巍巍舜治浹嘉生，宴俎豐年萬寶成。禁幄雲深開曉色，

上林風迴起秋聲。威加鼉鼓雷霆轉，喜動龍旂日月明。
應手神珠看電擊，旄頭消盡鐵山平。

次韻子雲春日

林壤欣欣樂有餘，杖藜常及曉鶯初。春風入戶花開落，
晴日當牕雲卷舒。契闊經年千里面，平安滿眼數行書。
弟兄州縣真勞爾，疇昔交遊半石渠。

問舍求田苦未成，定逢丘壑眼先明。極知官事無時了，
且作青山任意行。元亮折腰應自笑，子荆洗耳詎忘情。
不妨同是催科拙，下考他年更類城。

次韻子雲途中見寄

輕風獵獵轉殘紅
春去荒村暮雨中
花影帶寒猶黯淡
山光和霧更空濛
百年拚卻身長醉
五斗由來計日窮
慚愧賓朋有膠漆
不堪兄弟苦西東
十年計拙未能伸
四海滔滔總是津
但得有山供醉眼
不憂無地著寒身
鶯花撩亂空三月
風雨淒涼過幾旬
莫道衡陽無鴈信
故應時有北來人

次韻子雲盱眙道中三首

海上狼烽不起烟
兵戈猶記舊年前
巖居有客能招隱

肉食何人爲給鮮
但得生涯類盤谷
可無風景似斜川
共尋餽口田三畝
仍辦遮頭屋數椽

江南淮北市初通
人語忻忻作好風
抱耒只思耕隴底
買船誰復渡遼東
向來熊耳真投甲
此去天山擬挂弓
上策聖君今自治
白頭憂國寸心同

桑間無褐半飢人
斗粟千金不換銀
末路多慚追溝壑
長年敢笑走埃塵
江聲直下黃牛峽
河勢遙分白馬津
回首向來征戰地
壯懷俱在只傷神

答金元鼎喜雨

南浦日乙和 卷五 吳舒惟校
幾日雲陰合又開良田秋近起黃埃一觴未致靈祠禱
半夜先欣好雨來政拙自知客我懶詩清要是得君催
不妨咳唾皆珠玉漸喜新涼入酒杯

再次韻

雨後紅蕖滿意開風前綠淨絕纖埃獨憐病守孤吟賞
猶幸詩翁數往來農事已知溝澮足歡聲不待管絃催
旋春玉粒添冰釀莫負樽前鸚鵡杯

次韻趙文鼎雨中

老病幽栖不厭閒未須消息夢長安一春意淡連牆竹

終日香清小檻蘭紅蕖便驚風裏盡青林猶愜雨中看
故人詩卷從頭讀似酌芳樽爲解顏

次韻中甫兄九日同集張園

湖山秋盡作幽期未覺浮舟菡萏衰怯酒自憐多病後
強歌還憶少年時平蕪半綠煙猶接好菊微黃雨更宜
單父層臺在何許一樽懷古少陵詩

雪中走筆寄鄧延頌

去年雪裏共清遊蕭子酣歌幾唱酬竹葉又看新釀熟
梅花還作暗香浮青衫尚想君奔走短褐空嗟我滯留

南北兩峯銀色界不應孤負水邊樓

和同僚賀雪應祈

臘近春臨雪意遲
褰衣敢憚走靈祠
夜聽小雨猶傾耳
曉看羣山頓展眉
好句懸知得冰柱
香醪試爲壓羔兒
便應風月臺中客
不減梁園賦就時

次韻韓子師雪中二首

九門疊壁耀朝曦
不比千燈作上元
天與藥珠開漢殿
人將冰玉奉堯樽
寒威已覺邊聲靜
春意都隨詔語溫
夜入蔡州飛將在
肯容敵騎妄稱尊

曲欄高檻倚崔嵬
要是仙京白玉臺
雲色自連鳩鵲動
天顏亦爲近臣開
光翻午夜渾疑月
花滿新春未數梅
自笑詩成無好語
但知綈帶與銀杯

次韻黃文剛秀才雪中見詒且惠新柑

填空密雪借風威
深閉蓬牕晝掩扉
待學仙人乘鶴駕
未容寒士泣牛衣
連篇妙語千金重
滿合黃柑數寸圍
細酌清樽酬夜月
更看庭樹作花飛

次韻梁子張雪中約遊湖上不至

東風閣雨釀重雲
臘喜天街玉作塵
梅已著花還點綴

柳能吹絮便爭新湖光照坐偏宜晚酒力欲攔別是春
慚愧相如未能至卻將冰柱語驚人

次韻子雲歸興

湖海周游未卜居好山時一夢衡廬苦無事業堪調鼎
薄有生涯可負鋤玩世阮公方蠟屐歸田陶令亦巾車
屋頭早晚東西住愁絕江船夜雨餘

次韻曾吉甫題畫屏風

何許江山發興長渾疑廬阜對彭郎胸中丘壑元蕭爽
筆下煙波故渺茫落落疎松長映座冥冥飛雨欲侵牀

冷然已作華胥夢便有羣仙到枕旁

次韻王季夷時同宿蔣山

亭亭石塔寶公龕賸喜僧牀得對談坎壈詞場君亦滯
驅馳世路我何堪軍書又見紛南北敵勢由來說二三
淮岸西風晚更急似傳烽火過江南

次韻沈千里玉山道中見寄

霜晴懷玉自生烟寒色淒淒過鴈邊路轉湘南知幾日
山連楚尾又窮年相期鷄黍情歡甚惜別塵埃意黯然
馬上哦詩衝暮雪清風懷我北牕眠

次韻沈姪

平生作計本山林便腹空餘貯古今致主未忘他日志
歸耕每動十年心疎翎浪喜煙霄近弱植多慚雨露深
早決儒科猶望汝蹇然虛谷佇聞音

次韻李子永見慶新居

旋移桐樹占高岡更喜松筠翠作行簷外參差見林影
門前溶漾足溪光天涯留落還相識地上經營豈太忙
好事肯來三徑在已添籬菊待重陽

次韻沈駒甫觀石井

湖裏鴛鴦亦洞天最奇山下石坳泉一泓自覺寒光淨
六月都無暑氣煎清似錫峰藏雨露迴如篁嶺闕風煙
壁端舊乏騷人句從此須君妙墨傳

次韻王亞之來過橫碧

君到層軒眼爲寬諸峯還得雨中看嵐光照座蒼翠出
寺影拂波金碧寒詩興豈妨隨望極秋聲不奈起愁端
相逢莫怪無樽酒秀色崔嵬尚可餐

次韻宋傳道夜雨聞捷

松庭竹戶野僧家獨坐荒齋到日斜門外江風寒作雨

城頭戍鼓夜啼鴉對牀更欲論心事擁褐還驚逼歲華
卻憶巴山舊詩語夢回牕竹已生花

邊地山川自漢家蠡旗圖畫拂雲斜江干戰騎膺如虎
塞上神兵斧似鴉羽檄故應煩號令星車底用賦皇華
軍聲指日騰三捷陣勢他年本六花

再用前韻戲傳道

空谷天寒翠袖遮無人曾見玉釵斜詩成落日千尋竹
歌就殘陽萬點鴉樵額淺深知內樣舞衣裁剪勝京華
自憐已作高唐夢須信飢腸眼易花

次韻趙仲績久雨夜坐有感二首

春雲黯黯未成晴落盡緗桃見紫荆薄宦驅馳雙鬢改
流年荏苒寸心驚幽花映水淺深色啼鳥穿林高下聲
幾許風光欠行樂夜寒和雨聽殘更
十日風斜雨更橫一春能得幾新晴便須蠟屐穿花去
莫惜障泥傍水行酒興未妨隨處發詩狂賸判隔年程
醉來乞得西山藥髣髴雲間吹鳳笙

次韻張晉彥書事

舉世諸兄事孔方平生學易問歸藏漸欣過客知吾懶

未怪小兒如我長鶴怨猿驚成底事烏踰兔蹶自奔忙
便須耳熱追行樂更擬心齋得坐忘

次韻吳明可與史致道會飲牛渚

月出千山捲暮雲遙知玉節會江濱便應擊楫酬今日
不用然犀歎昔人煙外笛聲誰送晚水邊花影自迎春
風流三百年無此況有清詩句法新

次韻徐應祺小樓

激激清波拍路衢垂垂高柳對扶疎已知百尺樓堪臥
況有三重茅可居我老詎能廢鮑謝君才端合紹嚴徐

直須座上千鍾酒澆起胷中萬卷書

次韻答沈明遠

如君絕足向風塵顧我宜爲途路人阿買八分時自笑
阮瞻三語詎能新狂談尚欲嘲風伯妙筆真堪賦洛神
得酒相尋那厭數醉歸官長未應嗔

亞之出示其祖岐公墨迹及惠崇小景且和前韻
復次答之

壁上春江萬頃寬錦囊遺墨幸重看功名世路真多畏
貧賤交盟敢自寒新有詩聲見侯喜盡據懷抱得蘇端

極知鼎食君家舊未厭堆盤苜蓿餐

新晴梅花可愛欲招明遠少稷凍醪未熟

癡兒了事不能閒猶喜騷人共往還歲晚真成廢書史
雪晴那得負江山多情春與梅花厚一醉天于我輩慳
賸作新詩催酒熟出池冰斷水潺潺

紅梅

不隨羣艷競年芳獨自施朱對雪霜越女漫夸天下白
壽陽還作醉時粧半依脩竹餘真態錯認夭桃有暗香
月底瑤臺清夢到霓裳新換舞衣長

陸子逸惠桃花戲贈

故人招我千山裏也有仙葩巧送春麝馥染衣金縷重
酒紅生粉玉肌勻洛城景物知誰紀寒食風光觸處新
莫把天香調行客曉粧留與綠牕人

次韻陳子象十月惠牡丹

芙蓉掃地菊花陳國色天香一夜春愛景自催芳意動
清霜不礙曉粧新長生便可書仙籍上瑞端宜首頁珍

是日會慶節案考詩就只應開頃刻先生筆力起千鈞

用前韻以小春茶餉子象

仙花不用惱詩人亦有靈芽特地春
數朶嬌花真綽約
一甌醞白更清新
眼明共識西都豔
齒冷應懷北苑珍
佳茗奇葩堪竝賞
須公品第入陶鈞

次韻余寺正瑞香花

香爐峰下異香風
長憶幽芳夢寐通
渴雨旋傾茶作椀
護霜新織翠成籠
丹青點綴瓊瑤上
蘭麝飛浮錦繡中
花品曩來誰第一
似按玉蘂間鞞紅

故致政宣義葉公挽詞

葉山父

植德由來不自知
成家今見寧馨兒
名駒有種能千里

仙桂騰芳定五枝

公有三子二孫

綵綬螭坳方致養
素車雲路

忽興悲死生了了
真餘事流水斷煙空
好詩

挽王僑卿右司詞

壯年嘉譽藹瀛州
袞袞諸公並儁游
獻納未持天上橐
光華頻總嶠南州
牢盆贖算波熬素
蒲澤終期劍買牛
世路榮枯真莫問
浮雲山眇淚橫秋

挽汪南美大夫詞

年如衛武尚安強
名似康成善一鄉
三邑久知歌惠愛
西州何幸著循良
真清在昔傳家世
治狀由來籍廟堂

千載蔣山分未朽芝蘭玉樹藹餘芳

挽知泰州宋公大夫詞

投老溪南幸卜鄰一麾頻見寵章新養花別圃成三徑

種木佳城度十春公自營壽藏甚久前席遂孤明主意公入對天語甚

寵留鞭難繼灃陽塵空餘樽酒追隨地同社淒涼淚滿

巾

挽故鈐轄趙公彥遠詞子直

平昔長材未一施尚餘嘉譽藹天支事親養志人爭仰

教子成名世共推盛德故應傳後裔清規誰為勒豐碑

華林岡下寒泉水隱隱雷聲紀孝思母夫人畏雷他日彥遠聞雷輒涕下

楊待制挽詞

妙齡著足道家山壯歲升華玉筍班千里麾符纔假手

幾年香火竟投閒詩書坐使家聲大簪紱誰令壽歷慳

太傅功名有遺恨鵷雛凋落淚頻潸

周彥廣待制挽詞

淮海歡騰五袴歌政聲京兆益中和鄴侯井在功堪紀

鄭國渠成利更多紫禁遄躋知異眷珍臺歸臥本微疴

功名方展凌雲步奈此佳城白日何

故運使直閣少卿劉公挽詞 履子

清時得路每投閒垂上甘泉玉筍班借箸幾看趨魏闕
請纓常欲度天山放懷俠氣千夫上抵掌高談一夢間
使節塵生人共惜朔風吹淚太湖灣

故致政敷文少卿魯公挽詞

左學摛文藹儁聲青雲接武二難兄主知自紀宜三院
使節更持僅九卿庭下芝蘭方競秀舍南桃李已成陰
掛冠不待甘泉橐愁絕高門淚滿纓

故致政提刑少卿方公挽詞

籌策霑榮譽最賢青雲回步接英躔請纓莫遂終軍志
投紱方期衛武年原隰觀風頻玉節省臺聯秩近甘泉
一舟五鶴符佳夢陂水成湖問葛仙

挽主奉路分趙公詞 文鼎公

畫舸安輿書水清春風猶憶送君行無家舉案人方恨
有子分符世共榮德履未容居祭酒聲華端合主宗盟
太支耆老凋零甚蘭玉階庭獨擅名

故提點判院魏公挽詞 公濟

當年卓魯盛材猷循吏聲名始一州功在龍津看雨施

風行金穴見錢流
褒庸合上清華貫
秦課俄驚疾病留
疑疑諸郎富儒雅
蓋棺十世可無愁

劉子宣侍郎挽詞

妙齡嘉譽滿江東
晚接甘泉豹尾中
烜赫身榮知有道
從容心計不言功
威行峴首追羊叔
名在鄱江憶魯公
種木十年歸莫遂
塗車千里恨何窮

李壽翁侍郎挽詞

同解銓衡並把麾
五年相望楚江湄
鄰墻會面嘗談易
吏選偷閑更說詩
北客遭逢人共歎
公陞辭曰上有
北人難得之論南

州流轉事難知
投簪自有江湖志
雲白天青淚滿頤
公

終作詩有白雲青天之句

挽周仲深郎中詞

才力軒軒動漢庭
清時指日致功名
一同在昔歌遺愛
兩郡于今有治聲
使節暫分秦望重
郎星初近太微明
死生契闊空泉壤
賻典殊恩世亦榮

王中奉漢老挽詞

符節光華二十春
壯猷曾不侍嚴宸
棲心香火纔同社
放意溪山幸卜鄰
再世簪纓宜袞袞
一門蘭玉尚詵詵

南浦月已稀
卷五
吳舒惟茲

霜清三港追隨地丹旄飄然淚滿巾

呂伯恭挽詞

青雲塗路本青氈聖願相期四十年臺閣久嗟君臥疾
山林空歎我華顛傷心二女同新穴拭目諸生續舊編
斗酒無因相沃醑朔風東望涕潸然

周濟美挽詞

迺翁持橐舊知名兩郡分符見典型禁闈方應馳鶴步
中臺俄忽墮修翎故人零落風前葉北客漂流雨後萍
白馬素車三巷路淚兼臘雪灑林坰

暉仲叔挽詞

材業光華藹薦紳由來孝子出忠臣

七十叔祖世稱孝子載桐陰舊話

五年字邑祇明詔兩路觀風惠遠民徐穉湖邊纔卜築
葛翁山下忽棲神朔雲千里人揮淚遺命歸從大母鄰
五言排律

次韻唐與正喜雪二十韻

窮臘逢三白山城兩換年破寒初浙瀝作態正翩翹倚
杖心逾喜搔頭意自便直疑填巨壑豈惜涸長川宮粉
慙施白仙禽恨奪鮮銀牀凝露縷玉柱澁風絃徑滿巘

難認牕虛隙易穿共尋瑤草路俱誦藥珠篇獵騎朝羣
擁漁燈夜獨然凌風幾闌苑照日盡藍田賸約佳賓集
先煩好句傳荷枯疑璧碎柳細訝絲牽有士迷青眼無
人笑黑肩豐年期不日瑞氣靄非烟竹密還爭舞梅疎
只鬪妍輕鷗隨浩蕩戲蝶伴聯翩強續麻衣詠真逢縞
帶賢凋零屬國節片段廣文甌短棹尋安道高樓憶仲
宣名駒紛照夜無復愛連錢

湯丞相生日二十韻

寶歷千齡會神槎八月流人知挺生傑天欲中興周文

筆超三古聲名溢九州宏才自伊呂餘事豈應劉紫茸
開黃閣于今尚黑頭裴公旋臥護蕭相暫居留易奕稽
山綬光華綠野遊銀輿壽母貴玉耳上公優嗣聖資爰
立昌時副聿求來歸嘉季子入覲偉韓侯今日恢王略
蒼生歧廟謀中原尚紛擾絕塞要懷柔勝算如先定成
機會可投洪源端欲汎前箸匪無籌日月符羲馭乾坤
協禹疇行看靜蛇豕俱議息貔貅考有中書第官無太
尉酬兩京期迅掃九廟得重修祉福天方錫勲庸世未
休斯民納仁壽公壽幾千秋

投贈徐平江三十韻

上聖恢方域吳門翊帝京千秋季子國百雉闔閭城屏
 翰資良牧文昌輟貳卿龍輝虛紫橐虎節駐紅旌河潤
 功初洽棠陰政已成農桑歸愷悌竝管樂升平世仰慕
 公譽人高白傅名雲樓凌月府花鳥爛蓬瀛香霧凝春
 晝橋虹臥曉晴清規三不惑盛事四難并舊俗寧論化
 重臨倍有聲向來宣使指曾是格刑清自覲銅魚拜欣
 聞竹馬迎五湖歌吹滿兩郡吏民爭公嘗按刑浙右嚴
 助書頻賜蕭卿治欲更還應對宣室俱議直承明鼎席

猶虛位戎亭正息兵安危均注意中外等持衡補袞才
 猷壯康時智略宏天津飛驥足雲路逸鵬程疇昔參賓
 從頑疎荷鑒評馳驅奉刀筆談笑接簪纓夢結閩陬遠
 心驚漲潦橫寄身侔困鮒盡室追長鯨官牒霑微祿恩
 波拯再生膺門憐舊契禰薦及難兄未釋鹽車駕徒懷
 瓦釜鳴幾年良自哂一飽定誰營洛下裘空敝新豐酒
 獨傾知公行入輔故吏敢言情

少稷家觀雪賦江字三十韻

雪暮來無際長吟坐北牕未嫌光奪月先恐勢填江雲

色生冰柱風聲倒石砮疎簾纔的爍破屋漸錚鏦始訝
烏能白旋驚馬盡驪曾朝瓊飾弁獵較素綢杠玉帝開
宮闕瑤姬擁旆幢仰空蜂作陣窺徑蝶成雙價重連城
璞明逾釘壁釭冷烟紛莫辨凍溜不成淙計拙兮遼豕
塗窮笑越龙戴牛迷象齒覆鹿誤羊羴酪乳浮茶鼎花
葵瑩鼓控崖枯頻畏住鵠瘦暫胷肱共想周王宴誰虜
漢使降獻衣知念札加璧殆追逢蹇駟深憂沒籃輿重
莫扛淹鍾應預賜增斗定先撞短日棲窮巷豐年卜萬
邦緇塵異羈旅華髮逐耆厖處士欣尋戴參軍豈遇龐

裘穿心易怯履敗足微蹇荷笠閒垂釣迴船穩繫椿清
狂時仄帽泥飲屢空缸酬唱才皆敵歌嘲語或隄閉門
嗟懶惰授簡愧愚蠢戈戟森磨厲韶鈞富擊撻絮鹽翻
雅況蘭竹變新腔取醉華燈爛催歸戍鼓擊晴簷成夜
雨更聽隴頭瀧

南澗甲乙稿卷五

南澗甲乙稿卷六

宋 韓 元 吉 撰

五言絕句

遺直堂六首

蒿萊自輿臺松桂猶伯叔便合追孔林無庸號寒木
虬龍舞雲端風雨來海上尙想堂中人詩成一迴向
苦心有深思勁質無軟語賢科廢因公此事亘千古
種木已如此高賢有餘思賴公酷似舅其誰羨牢之
鄭虔骨已朽孔父天不遺他年從事賢手拔空倒持

棟梁乃不取得地且深植妖嬈紫薇花歲晚猶伴直

夜宿斜溪聞杜鵑

解攬山銜日移舟雨暗溪無情子規鳥夢斷隔林啼

送龐祐甫五首

燕鴻望南飛春至還北去託食波浪中瀟湘幾回渡
遊子思故鄉天涯兩相逢時平甘卹緯定交各塗窮
濯濯機中絲粲粲錦繡段自非心同人千金孰肯換
江湖多青山舟楫長往還山色難送客不如住山間
中宵權謳發菰蒲翳明月月黑君忽行恐墮蚊龍窟

六言絕句

題日出雨腳圖二首

絕壑春林映綠半山曉霧迷紅長憶西巖夢覺小舟欵
乃聲中

隱隱遙分樹色蕭蕭似聽風聲何處江傾海墮隔山霧
白煙明

次韻趙公直題米元暉畫軸

天際歸雲挾雨江干亂木藏山耳冷似聽蕭瑟眼明驚
見孱顏

南浦日之稱
卷六
吳舒帷校

二

吳舒帷校

七言絕句

春雪得小詩五首且約客登賞心亭

東牕坐愛枝間雪大似醪醖壓架花天氣更晴宜有月
夜深來看玉交加

淮南山色一千里落水層城江更滿何地江山有如許
與君聊趁雪中看

臘前未見梅如雪春到還驚雪似梅可是天公有情思
便令花樹一時開

江南絕景賞心亭臥雪難尋舊畫屏白鷺洲前夜來雪

故應此畫勝丹青

竹爐聽雪坐蒲團長笑詩人不耐寒未辦貂裘走南陌
肯來高處一憑欄

夜雪

爐火深紅蠟炬明打牕風雪正縱橫瓦瓶旋注山泉滿
卻作瀟瀟細雨聲

伴眼文書細作行昏昏愁臥雪穿廊何人恰弄風前笛
錯認梅花到枕傍

詠晴

南浦日之稱

卷六

三

愁眼東西萬里情
山雲斜度水風清
客行歲晚忽春盡
看到枯林綠葉成

春日書事五首

十年騎馬聽朝雞
老竊州符簿領迷
衙鼓不聞春睡足
閉門聊喜得幽棲

曉猿夜鶴寂無聲
春至山禽百種鳴
步繞新泉聊洗耳

由來心與地俱清

所居山下
得泉甚異

極目亭邊花定開
野棠山杏手親栽
春風拂檻知何似
應記劉郎兩度來

憶上金華第一峯
相君官重酒樽同
夢尋絕壑誰重到

零落山桃小院風

溪邊亂石蛟鼉臥
煙裏千花錦繡圍
記得年時作寒食

山橋吹笛雨中歸

山橋金華
山勝處

晨興

北牕松竹夜蕭騷
詩就呼兒進濁醪
睡美不知新雨足
曉來南澗水聲高

聽雨

伊軋簷輿不計肩
五更殘夢尚悠然
紅油蓋重聽朝雨

卻似西江坐釣船

題張幾仲所藏醉道士圖

何須坐客總能文呼酒相逢日暮雲醉倒盡如狂道士

夜歸誰問故將軍

幾仲移節稽山淳熙庚子歲除前一日會飲上饒傳舍觀圖戲書南澗翁

韓某無咎

浙江觀潮

江翻海涌勢難平鼇擲鵬鸞自不停端為君王洗兵馬

參旗井鉞萬雷霆

太湖秋晚

片帆幾日下西風湖色秋容暮靄中買得鱸魚弔張翰
臥聽欵乃度垂虹

海門斜照

雲夢懸知八九吞銀山萬疊漲天門長江日落魚龍舞
古寺煙深鳥雀喧

武昌春色

樊山宮殿已成陳煙雨陰晴到處春花柳不知興廢事
隔江相倚鬪時新

七夕

銀河翻浪拍空流
玉女停梭清露秋
天上一年真一日
人間風月自生愁

秋懷十首

朝行佛屋魚千里
暮借僧牀鶴一枝
牕下秋蟲解人意
似憐羈客伴哦詩

酒熟橙黃盛物華
重陽無客不思家
鵝兒剪雪開巖桂
鶴羽攢金散菊花

小雨驚秋滴夜闌
晴雲和日曉斑斑
誰憐客舍塵埃底
猶得西湖一兩山

何許砧聲清夢回
丁東猶作珮環猜
卷簾風露涼如水
端爲嫦娥向此來

城外秋荷一半黃
尙餘疎柳照回塘
江南底許風光好
塞鴈來時未有霜

右手持杯左不空
蟹螯已作雪蒙茸
秋風莫起鱸魚夢
未似先生阿堵中

八月濤頭舊有名
今年潮淺岸纔平
應緣享帝千靈在
豫使魚龍不敢鳴

塞草初黃邊馬肥
邊塵莫便向南飛
江頭鶴唳秋風起

看取陰山六騎歸

江南四百八十寺未抵西湖勝處多不用樓臺帶煙雨

只看宮殿壓晴波

閉戶跣趺意已清爐香燒盡一燈明空庭葉落知多少

一任西風百種聲

聖政更新詔書正告許之罪因得小詩十首

鑑通

編紹興二十五年十月秦檜死黜檜姻黨十一月
釋趙汾及李孟堅王之奇等自便十二月復張浚
胡寅張九成等二十九人官徙李光胡銓于近州
二十六年正月追復趙鼎鄭剛中等官此詩所謂
十年言路皆支黨雷州司戶卻生回
衛公精爽故依然皆記其事謹附識

惡復凶終事久知豈知聖斷不踰時小儒未歎周南滯
但喜逢人敢說詩

桓溫將死謝安起霍氏初除魏相來誰與聖君安大業

巍巍廊廟可無材

聖朝遂失誅元載公議猶能去霍山落膽徒聞溫御史
不知睿意在羣奸

元祐諸公秉國均詔條先請惠吾民孤雛腐鼠何勞逐
準擬朝廷政事新

金貂七葉誰能必石槲三年計自愚得鹿覆蕉真一夢

求魚緣木信狂圖

獻可爭先詆荆國瑩中居首論莆陽十年言路皆支黨

前無一語譏安昌

支黨用詔語

近聞羔鴈已成羣藻鑿渠能涇渭分急士且須侯雍齒

得賢端可吏朱雲

刺字幾漫冠欲塵向來浮薄自紛紛爾曹胸次多周孔

忍作銅山破賊文

荆棘誰令滿路栽雷州司戶卻生回獨憐陽陸真天命

不見承平公道開

潮陽初謫八千里中令俄成十九年地下修文應泚筆

衛公精爽故依然

臥病

有身自覺皆為患了事從來卻號癡貧裏定知強健樂

未妨斗酒百篇詩

夜宿青陽旅舍起觀林端積雪半消疑山磬盛開

風卷千林夜雪晴九華山下月微明不須更覓唐昌藥

樹樹瓏璵玉刻成

去草

永日荒園獨荷鋤草根藤蔓喜無餘誰憐仲舉平生志
卻學齊民種樹書

偶興四首

桂花飄盡菊花黃閑對芳叢靜愛香堂下草深須一丈
會看春意滿池塘

小園無數菊花開準擬花殘便見梅不恨無花正無酒

敲門誰送一樽來

時有遠客惠酒

江南菊少開金色只有霜葩雜御黃乞得黃花真愛惜
明年賸種壓羣芳

愛水仙成百計栽三年一笑漸能開金銀豈是吾家物

借我虛名付酒臺

世言水仙一移三年乃開

市人有弄虎者兒輩請觀飼以豚蹄觀其攫噬戲

作四絕句

耿耿出柙小於兔猶意他年見畫圖養汝由來得無患
卻驚赤手競編鬚

呀然一嘯朔風生兒女窺簾笑且驚檻內應憐只搖尾
山中不記舊橫行

長年肉食定何功乞汝豚蹄且慰窮猿臂將軍應老矣

南山忽憶夜彎弓

熒熒目色爲生寒
蠻獠歌呼意自閒
莫倚便能探虎穴
勢卑還長越王炎

俸金旣盡家人問
所質物戲答

十載棲遲櫺具客
一生憔悴屢屢歌
典衣不爲沽春酒
平昔無詩博飯籬

讀周瑜傳

年來三十過平頭
笑卻周郎卻自羞
但得小喬歌一曲
未須辛苦向荊州

乘潮遇順風

忠信平生自可期
江神于我定相知
順風鼓棹潮如席
世事由來卻險巇

山行二首

晴日烘林百草香
杖藜徐步興何長
殘花的皜明幽徑
老筍參差出斷牆

春來南澗水初生
鷗鳥逢人自不驚
步繞幽花隨樹歇
望尋高柳趁隄行

行泮渠中

東海桑田未可期
隋河高岸已鋤犁
樓船錦纜知無地
枯柳黃塵但古隄

剡溪道中五首

擬賦歸田未有田
春風聊泛剡溪船
青山滿眼留儂住
處士茅茨阿那邊

戴家家住此溪頭
買酒尋春得勝遊
夾岸楊花渾似雪
不應興盡便迴舟

平潮恰恰亂蛙鳴
斷送江南春雨晴
綠縠細看桑眼破
紫茸還見草心生

心隨天末江波遠
愁似沙津柳帶長
向晚飛花度牆影
半晴煙雨發山光

抱琴不作王門客
晉代高風只此人
故老底須三上疏
竹林諸子未天真

隱靜山二首

乾道戊子七月旦日題

山鎖松行一逕遙
峰迴樓殿更岧峩
飛來雙鶴知何處
只有泉聲下碧霄

海上蟠桃手自栽
紅塵一墮隔蓬萊
風帆弱水無由到
乞我當年渡海杯

狼山

天外奇峰認九華
路人指點是狼牙
他年刻石題車馬
會遣山前屬漢家

初見龜山塔

煙裏微茫第一山
眼明白塔俯滄灣
塵埃滿面三千里
一笑相看似夢間

山口道中

芳草連雲水拍溪
春山樹樹子規啼
東風何事催行客
偏遣殘紅趁馬蹄

望靈壽致拜祖塋

白馬岡前眼漸開
黃龍府外首空回
慙慙父老如相識
只問天兵早晚來

宿石橋聞水聲

野橋曲折渡千回
古寺懸知水面開
一夜寒聲喧客枕
卻疑風雨轉山來

洞溪絕句三首

桃李欲開天雨雪
二月山城無奈寒
賴爾狐裘來送質
更須樽酒放愁寬

杏花無數連村落也有人家掛酒旗春色撩人只供醉
卻怕風吹易醒時

溪流直傍長堤去繚亂半山桃李花極知渡口好春色
卻下扁舟步晚沙

西湖絕句戲題

淺白深紅幾樹花波光浮動竹交斜怪來詩思清人骨
知是西湖處士家

流水當階山對門擬尋茅屋住荒村誰憐九里松間路
猶有人間市井喧

人道西湖一曲屏只應真色畫難成柳隄竹塢無窮意
更著荷花百媚生

渡河有感

袞袞河流到底黃誰言一葦便能杭傷心擊楫無人會
舉酒回頭酹太行

同翁子功之平江午憩涵山淨慈寺

蘋花吹盡藕花香日落風生水面涼淨洗扁舟載明月
共君長嘯飲湖光

曇花亭供茶戲作二首

問訊高真此住家伊蒲未辦且煎茶故應一笑來迎我
五百瓶中總是花

一聲鍾磬有無中樓閣山林木自空不向雲端呈伎倆

猶來盞裏現神通

是夕始聞鐘聲而金燈不現

夜宿玉虛宮小軒正對步虛峯道士云天寶三年
有慶雲見且山呼萬歲始詔建黃帝祠封爲仙都

山敕書今亡

檻外風高霜月明步虛山裏步虛聲罷琴刻燭初長夜
又得人間一夢清

封禪空餘不死名華清宮裏望長生閒雲強作人間瑞
更有山呼萬歲聲

龍虎驅馳戰阪泉荆山鼎就更昇天軒轅到處存遺跡
忍使君王不學仙

溪山堂次韻

溪岸人家高下居繞溪雲樹雜煙蕪故應曲水傳佳句
還喜青松入畫圖

又溪山堂次韻四首

堂前松竹挺千軍堂外青山萬馬羣橫策時來按文陣

要須筆力起風雲

澌澌溪光白鳥前
昏昏雨脚暮雲邊
一年風景君應記
五月來看競渡船

九衢塵土鬢毛蒼
只有溪山意味長
但得楓林供款乃
猶勝斗酒博伊涼

梅子青青杏子紅
繞城荷葉已掀風
莫嫌春盡無花柳
猶得清樽阿堵中

紫極觀二首

小雨輕雲卻解晴
菰蒲衝浪過船聲
已無桃李占春事

濃綠滿山風更清

楊柳花飛杏子新
園林無地可留春
卻尋風雨江邊路
慚愧煙霞物外人

漢光武廟

涿郡漁陽此路分
用兵諸將總如神
白頭浪說關中事
鄧禹當年已笑人

賀子忱抱膝庵二首

紫橐光華穩致身
會看功業上麒麟
丈人久悞人間世
莫忘他年蕙帳春

南浦甲乙稿 卷六 吳舒惟校
紅覆薰籠錦不如萬株相倚占春餘小牕睡足花陰裏
何似天香下玉除

釣臺

璜溪亦有釣魚人一笑鷹揚掃戰塵不會先生辭漢祖
投竿深坐此江濱

答人問易

陰陽妙用表三才卻問陰陽底許來若識陰陽由動靜
何人更作有無猜

鐵鏡贈仲儼

石門江畔鴈山前芥室遙知更豁然百鍊精明真是鐵
不妨照破野狐禪

明老惠炭戲以二小詩

雪裏難逢送炭人地爐炙手便生春酸寒東野真堪笑
解道曲身成直身
道人作喜每逢場一束烏薪發電光便使樽前化紅袖
不妨笑殺許旌陽

訪吳元鼎如村五首

野竹漫山水漫門未離城市卻如村何須更問柴桑陌

三徑雖寒菊尚存

我住城南君在西柴門草長與人齊不妨共踏溪津路

日日雲山入杖藜

經旬泥潦路難乾煙裊長林雨暗山常笑詩人愁屋漏

卻思寒士與千間

昔年曾歎馬相如才氣飄飄賦子虛未怪家貧徒四壁

先生四壁儼人居

我生甲子幸君同君自臞仙我秃翁要拍銅鞮論歲月

莫嫌相對只詩窮

史十伯強浮沈市廛自號道人而筆力議論不可

掩抑豈隱者耶觀其詩卷贈以絕句二首

未容君識得君詩添我幽栖一段奇會有吹噓天上去

沈香亭北要新詞

頭上塵冠豈易彈匣中長劍篋中丹放懷風月真餘事

好向朝廷策治安

次韻李平叔直舍竹二絕句

寒梢到地不肯屈迸筍出簷還作行故應餘韻占風月

要自勁節含冰霜

南浦甲乙集 卷二 二一吳舒雅詩
詩翁愛竹有佳句詩就移官可奈何密葉歲寒應更好
賸來和雪看婆娑

姜特立寄詩編爲賦四首

十載文場未奏功鵠冠一笑且春容遙知橫槩荻蘆岸
海闊蛟鼉赴筆鋒

少年耽句千篇在老境忘言半偈無失喜因君還絕倒
但驚寒雀費隋珠

榕葉青青荔子紅三山十寺粵王宮誦君好句渾如畫
寄我清遊夢想中

宋景文爲工學問賀方回亦擅詩歌半山人去東坡沒
妙墨空嗟楮上磨

重午齋宿讀蔡迨文編以酒饋之

長安米賤不難居玉署金閨有直廬指日君王嗟見晚
凌雲誰似馬相如

沈香亭上未傳宣斗酒揮毫自百篇研雪新蒲甌弄碧
遙知獨酌意悠然

九日送酒與朱元晦

平生愛酒陶元亮曾繞東籬望白衣底事秋來猶止酒

重陽須插菊花歸

老大相望寄一州故人鄙我倦追遊應知命駕無千里
惆悵山堂暮雨秋

航弟自廣潤省墳金華作二絕句送之

族緒彫零不計年戶曹一卷更蕭然恨無收斂冠巾計
送汝安心穩坐禪

烏玄鵠白從來事兔角龜毛本自無日用不知何許是
漫言實相與空虛

送沈信臣赴試南宮五首

山城寒陟夜飛霜楓葉青紅帶夕陽夾道梅花有春色
不妨衝雪到錢塘

僕射吳興自世家迺翁勲業著金華似聞玉座詢名字
會伏青蒲掌白麻

共踏槐花記昔年一彎新月夜移船君行爲問靈泉水
夢到松林石壁前

漫仕雖同官事殊故人來往未全疎因君時一論文字
難我窮年困簿書

吾謀不用可無人小技文章亦有神一第區區見戲耳

南浦甲乙和
請君折取桂爲薪

次韻石林見貽絕句四首

平昔勲名步玉除
碧油幢下見懸車
定知他日平泉記
不數當年種樹書

敢從州縣歎徒勞
斗米真成費策蒿
一醉石林巖下月
世間無復武陵桃

青山白水對開簾
佳句中邊勝蜜甜
機杼由來千丈錦
區區割截笑江淹

先生德業萬人雄
尋尺猶收爨下桐
乞與朱絃弄流水

坐聽巖壑起松風

次韻沈明遠春盡書事

街槐園柳綠初連
花盡春歸思黯然
密葉鳴琴清夢斷
白雲雙眼暮山前

次韻子雲春日雜興五首

馬上還逢江上春
冷煙和雨作紅塵
不堪柳絮催行客
也有桃花似故人

鶉鳩鳴時春事空
菰蒲葉小未成叢
已拚江草無情綠
不奈山花恣意紅

瓦盆傾酒未全貧
歲歲田家肯負春
不恨酒醒花落去
花開酒盡最愁人

綠陰池沼亂鶯流
眼底春來鬢卻秋
不用黃金買白日
待尋三徑作歸休

山如眉綠畫新就
江似蒲萄始潑醅
收拾風光付佳句
此行嗟我未空回

又次韻子雲春日絕句三首

亂離誰意有新春
共醉春盤能幾人
但道沙場無匹馬
便驚羅綺總爭新

春來殘雪自消簷
只有愁人鬢雪添
未省雙鞬談豹略
且聽紅袖唱香奩

日月行天自漢家
十年京洛恨無涯
兒童不識鄉園事
競說江南春後花

次韻子雲寄楊仙姑酒絕句二首

海上冰漿冠八州
舊傳仙姥下層樓
一樽壓倒長安市
白墮青春未解愁

蒲萄底用博涼州
有酒逢秋更上樓
留取楊家風味客
對牀來此話離愁

次韻子雲中秋見寄二首

風雨經時憶對眠，秋聲愁絕雁橫天。
未應放卻西樓月，得酒寧須問聖賢。

水繞孤城意自由，遠山無數鬱相繆。
月明又作中秋好，白髮相望在兩州。

次權歌韻

宛宛溪流九曲灣，山猿時下鳥關關。
釣磯茶竈山中樂，大隱蒼屏日月閒。

次韻趙文鼎同遊鵝石五首

繚繞雲山溪水南，溪光溶漾滴晴嵐。
不知日暖花爭艷，但覺風和酒易酣。

桃花臨水喚人看，花在嶙峋翠石間。
莫惜持杯酬爛漫，更須扶杖俯潺湲。

長憶湖山天意新，詔恩大尹宴羣臣。
休尋輦轂紛華夢，且作林泉自在人。

澌澌煙波帶月華，渡頭江迥兩三家。
細傾社甕鵝兒酒，

共聽山村楊白花。

是日社

幾年家住玉溪頭，乘興時來上釣舟。
古寺幽情未曾到，

尋春一爲野僧留

入冬苦雨禱晴幸應劉若訥惠詩爲賀因次其韻
雨餘雲杪澹踈星老病窺簾眼自明農事已知今歲好
天公賸放十分晴

酒難忘處能消日雨不愁時任戴星欲和新詩無好語
竹牕燈火夜晶熒

燈花作喜夜來占樓角初晴月似鐮便說市亭新酒美
好風寒日舞青帘

麥田秋過未休工穰稔如雲白雨中乞得晴明三十日

披襟可詠快哉風

次韻鄭守舜舉喜雪四首

好雪相仍歲又除豐年瑞事總堪書未嫌款段追千騎
化作張仙跨白驢

使君仙骨迥無儔合上瓊樓倒玉舟雪裏漁簑詩更好
盛傳僧舍與歌樓

銀似豪家沒奈何玉成高壘更巍峩殘年共擬看三白
酌我從今未厭多

湘吳醇酎愜兼衣多病難禁玉笋飛月下更期看國艷

凌波那更舞江妃

鄭守用前韻見示因亦和答四首

臘裏三看雪滿衢使君當奉十行書先生履敝人應笑
泥滑東家許借驢

九陌歌呼屬後遊一簑風景付漁舟相逢且向南溪看
玉作靈山萬石樓

振廩糜金氣自和政聲誰爲勒嗟峩牛羊壠上飢民絕
鵝鴨池邊勇士多

天巧由來不露機冰漸剪出萬花飛瓊瑤似識漢川女

瑤瑟更逢湘浦妃

次韻務觀城西書事二首

臘盡雪晴春欲柔濛濛烟柳認瓜洲潮生潮落無窮事
江水東西不限愁

川搖百艇陸千車多是淮南避地家黃紙赦來戎馬去
兒歌婦笑揔啞啞

次韻王季夷時同宿蔣山

北山應見太清年興廢由來亦偶然自我得之還自失
老禪刀尺尙相連

草堂一壑轉山腰杖策無因隱士招蕙帳只應容我老
冷猿孤鶴夜寥寥
當年丞相讀書林誰識更張萬事心壘上牛羊共回首
插天喬木暮陰陰

墨梅二首

西北佳人絕代姿傾城傾國未爲奇自然冰雪生顏色
不用人間朱粉施
影落寒塘月照時夢爲蝴蝶繞高枝畫工欲畫無窮意
不道幽人賸得知

栽梅

人將粧額半凌晨天與仙風自絕塵歲晚相逢有如此
爲君傳取雪中真

暉仲惠梅花數枝

霜餘不用怨年華已有寒梅一兩花眼冷故知春意動
瓦餅終日看橫斜

莫問南枝與北枝幽香先與小春期直從的皜寒梢數
看到飄零似雪時

江上春風幾日回一枝先傍小堂開恨無冷艷連天白

已有生香特地來

賸買青春不費錢
眼明江靜月爭妍
詩人每負梅花債
屈指今年第一篇

蠟梅二首

白璧黃金取意裁
極知變態自江梅
風流一樣香仍好
共趁春前臘後開

未愜籬東染御黃
天香特地剪蜂房
應憐雪裏昭君怨
洗盡鉛華試佛粧

燕山道中見桃花

今日風橫車少塵
卷帷聊看塞垣春
已驚漠漠花經眼
也有濛濛絮撲人

去歲得黟江縣牡丹數種
今年開一枝蓋白者譜
中所謂水晶毬也

黟江新漾水晶毬
冰雪肌香體更柔
彈壓風光知第一
醪醑玉蘂見應羞

汴都至南京食櫻桃

銀盤日日飽朱櫻
不負歸轅過兩京
身到江南梅未熟
故園風味夢關情

以雙蓮戲韓子師

雨洗風梳兩鬪新
凌波微步襪生塵
真成紅玉嬌相倚
不減昭陽第一人
並舞連歌意態新
水晶宮裏向無塵
一時風月誰能許
要是君家兩玉人

種竹

香苞吹盡翠成圍
牆角蕭蕭一徑微
已喜軒牕無俗韻
更憐風月有清輝

謝陳秀才送詩

偶因借得官書讀
小札于君一向疎
忽寄江湖詩百紙
梅花擔上雪晴初

用梁士衡韻還鄧器先道中詩卷

夢繞江南雲水鄉
麻姑壇下月如霜
風光景色一千里
都在君家古錦囊

悼老瓊二首

歌舞相從六換年
秦箏已斷不能絃
荷花滿眼垂楊綠
腸斷清宵月正圓

江水東流湖水西
水邊花落夢回時
南屏山下風吹土

猶作蕭蕭暮雨垂

紙鳶

排風決起鬧羣兒
勢力由來一線微
天上鷓鸞徒似耳
卻驚遮日傍雲飛

廬山霽色

山北山南佛寺開
煙銷日出更崔嵬
讀書誰伴謫仙老
沽酒要須陶令來

靈隱冷泉

山涵水影兩空明
水到山前百尺清
洞裏臞仙應一笑

抱琴時爲寫寒聲

南澗甲乙稿卷六

南澗甲乙稿卷七

宋 韓 元 吉 撰

詞

點絳脣

十月
桃花

木落霜濃探春只道梅花未嫩紅相倚灼灼新粧膩
莫問仙源且問花前事休辭醉想君園總是生春地

浣溪沙

次韻曾吉
甫席上

莫惜清樽領客同已無花伴舞衣紅強歌歸去莫怱怱
細雨弄煙煙弄日斷雲粘水水粘空醪醖飛下晚來

風

霜天曉角

蛾眉亭

倚天絕壁直下江千尺天際兩蛾凝黛愁與恨幾時極
怒潮風正急酒醒聞塞笛試問謫仙何處青山外遠
煙碧

前調

夜飲武將家有歌霜天曉角者聲調淒婉戲為賦之

幾聲殘角月照梅花薄花下有人同醉風滿檻波明閣
夜寂香透幕酒深寒未著莫把玉肌相映愁花見也
羞落

菩薩蠻

青陽道中

春殘日日風和雨煙江日斷春無處山路有黃鸝背人
相喚飛 解鞵宿酒醒欹枕殘香冷夢想小亭東薔薇
何似紅

前調

蠟梅

江南雪裏花如玉風流越樣新裝束恰恰縷金裳濃熏
百和香 分明籬菊艷卻作粧梅面無處奈君何一枝
春更多

前調

夜宿余家樓聞笛聲

薄雲卷雨涼成陣雨晴陡覺荷香潤波影澹寒星水邊
燈火明 白蘋洲上路幾度來還去欹枕恨茫茫笛聲
依夜長

前調

鄭舜舉別席有觴

詔書昨夜先春到留公一共梅花笑青瑣鳳凰池十年
歸已遲 靈溪霜後水的的清無比似使君清要知
清更明

前調

春歸

牆根新笋看成竹青梅老盡櫻桃熟幽牆幾多花落紅

成暮霞 閉門風又雨只道春歸去媚臉笑持盃卻驚
春思回

前調

葉丞相園賞木犀次韻子師

梧桐葉上秋蕭瑟畫欄桂樹攢金碧花底最風流相逢
不上樓 數枝添寶髻滴滴香霑袂杯到莫留殘霧牕
疑廣寒

減字木蘭花

雪中集醉高樓

壺中春早剪刻工夫天自巧雨轉風斜吹作千林到處
花 瑤池清淺璧月瓊枝朝夢見莫上扁舟且醉仙家

白玉樓

前調

次韻
趙倅

風梳雨洗玉闌瓊樓何處是萬里秋容喚起嫦娥酒未
中相逢且醉忙裏偷閑知有幾況自豐年須信金華
別是天

訴衷情

木犀

疎疎密密未開時裝點最繁枝分明占斷秋思一任曉
風吹金縷細翠綃垂畫欄西嫦娥也道一種幽香幾
處相宜

謁金門

春雪

春尚淺誰把玉英裁剪儘道梅梢開未遍卷簾花滿院
樓上酒融歌暖樓下水平煙遠卻似湧金門外見絮
飛波影亂

前調

重午

幽檻暑又是一年重午獵獵風蒲吹翠羽楚天梅熟雨
往事瀟湘南浦魂斷畫船簫鼓雙葉石榴紅半吐倩
君聊寄與

好事近

辛幼安
席上

華屋翠雲深雲外晚山千疊眼底無窮春事對楊枝桃
葉老來沈醉為花狂霜鬢未須鑷幾許夜闌清夢任
翻成蝴蝶

前調

鄭德與
家留飲

秋意滿芙蓉紅映小園叢竹風裏鳳簫聲颺有新粧明
玉詩翁相對兩悠然一醉繞黃菊目盡晚山橫處共
修眉爭綠

秦樓月

次韻陳
子象

鶯聲寂春風欲去難蹤跡難蹤跡幾枝紅藥萬金消得

青銅鏡裏朱欄側照人也似傾城色傾城色一樽莫
負賞心良夕

清平樂

辛丑重陽日劉守
招飲石龍亭追錄

危亭崛起卧蒼龍絕景畫圖中便作龍山高會千年樂
事能同使君晏處丹楓影淡黃花香濃不惜歸鞍照
月直教破帽吹風

賀聖朝

送天
與

斜陽只向花梢駐似愁君西去清歌也便做陽關更朝
來風雨佳人莫道一杯須近總眉峯偷聚明年歸詔

上鸞臺記別離難處

西江月 閩重陽

一度難逢佳節今年兩度重陽菊花猶折御衣黃莫惜危亭更上 況有飛觴灑玉從教醉帽吹香興來相與共清狂頻把新詞細唱

前調 春歸

山路冥冥雨暗溪橋陣陣花飛一年寂寂又春歸白髮自驚塵世 不惜障泥渡水且尋團扇題詩杜鵑休繞暮煙啼我欲風前重醉

燕歸梁 木犀

涼月圓時翠帳深鎖非霧沈沈廣寒宮裏未歸人共結屋住黃金 繁枝未老秋光淡好風露總關心天香不奈遠相尋更剪巧上瑤簪

南柯子 次韻姚提點行可席上見贈

急雨朝來過濃雲晚半收荷香便傍酒樽浮極目淡煙斜照滿芳洲 消盡人間暑翻成一段秋使星南楚轉東甌只恐禁林歸詔未容留

前調 黃德道中

野杏搏枝熟戎葵抱葉開村村簫鼓畫船回客裏不知
時節又相催 角黍堆冰椀兵符點翠釵去年今日共
傳杯應撚榴花獨立望歸來

浪淘沙 覺度寺

席地賞殘紅少駐孤蓬一春不奈雨和風雨自無情風
有恨花片西東 雲澹遠峯濃綠遍高柯神仙知在此
山中萬古消凝多少事日盡晴空

前調 趙富文席上

倦客怕離歌春已無多閑愁須倩酒消磨風雨纔晴今

夜月不醉如何 玉笋灑金荷情在雙蛾二年能得幾
經過花滿碧溪歸棹遠回首煙波

前調 芍藥

鷓鴣怨花殘誰道春闌多情紅芍待君看濃淡曉粧新
意態獨占西園 風葉萬枝繁猶記平山五雲樓映玉
成盤二十四橋明月下誰凭朱欄

鷓鴣天 雪

山繞江城臘又殘朔風垂地雪成團莫將帶雨梨花認
且作臨風柳絮看 煙杳渺路瀾漫千林猶待月爭寒

南浦日之春
憑君細酌羔兒酒倚遍瓊樓十二欄

前調

九日雙溪樓

不惜黃花插滿頭花應卻爲老人羞年年九日常拚醉
處處登高莫浪愁 酬美景駐清秋綠橙香嫩酒初浮
多情雨後雙溪水紅滿斜陽自在流

前調

九日登赤松絕頂

老去休驚節物催菊花端的爲人開攜壺幸有齊山客
懷古還如單父臺 松掩映水縈回使君強健得重來
不須細把茱萸看且盡豐年酒一杯

虞美人

送韓子師

西風斜日蘭皋路碧嶂連紅樹天公也自惜君行小雨
霏霏特地不成晴 滿城桃李春來處我老君宜任莫
驚華髮笑相扶記取他年同姓兩尚書

前調

懷金華九日寄葉丞相

登臨自古騷人事慘慄天涯意金華峯頂做重陽月地
千尋風裏萬枝香 相君攜客相應記幾處容狂醉雙
溪明月亂山青飛夢時時猶在最高亭

前調

夕七

南浦日之高

卷七

八

煙霄脉脉停機杼雙鵲飛來語踏歌聲轉玉鉤斜好是
滿天風露一池花離多會少從來有不似人間久歡
情誰道隔年遲須信仙家日月未多時

前調

葉夢錫園十
月海棠盛開

詔書昨夜催春到綠野花爭早幾枝先見海棠開全勝
隴頭衝雪寄江梅破寒滴滴嬌如醉不比春饒睡萬
紅千紫莫嫌遲看取滿城花送袞衣歸

夜行船

再至東陽有歌予
往歲重九詞者

極目高亭橫遠岫拂新晴黛蛾依舊策馬重來秋光如

晝霜滿翠梧高柳菊美橙香還對酒歡情似那時重
九樓上清風溪頭明月不道沈郎消瘦

南鄉子

龍眼未聞有詩
詞者戲爲賦之

江路木犀天梨棗吹風樹樹懸只道荔枝無驛使依然
贏得驪珠萬顆傳香露滴芳鮮並蒂連枝照綺筵驚
走梧桐雙睡鵲應憐腰底黃金作彈圓

前調

中秋前一日
飲趙信申家

細雨弄中秋雨歇煙霄玉鏡流喚起佳人橫玉笛凝眸
收拾風光上小樓爛醉判扶頭明日陰晴且漫愁二

十四橋何處是悠悠忍對嫦娥說舊遊

醉落魄

務觀席上索賦

樓頭晚鼓佳人莫唱黃金縷良宵燈火還三五腸斷扁舟明日江南去
離觴欲醉誰能許風前蝶鬧蜂兒舞
明年此夜知何處且插梅花同聽畫簷雨

前調

戊戌重陽龍山會別

菊花又折今年真是龍山客杯行激灩新醅白一醉相歡莫便話離惻
從教破帽頻欹側樓頭霜樹明秋色
憑高待把疎星摘天近風清不怕暮雲隔

一剪梅

葉夢錫席上

竹裏疎枝總是梅月白霜清猶未全開相逢聊與著詩催
要趁金波滿泛金盃多病慚非作賦才醉到花前探得春回
明年公已在鸞臺看取春風丹詔重來

臨江仙

次韻子雲中秋

記得年時離別夜都門強半清秋今年想望只鄰州星連南極動月滿大江流
芸閣老仙多妙語雲階清夢曾遊屐聲還認庾公樓金波搖酒面河影墮簾鉤

前調

寄張安國

自古文章賢太守江南只數蘇州而今太守更風流熏
香開畫閣迎月上西樓見說宮粧高髻擁司空卻是
遊頭五湖莫便具扁舟玉堂紅藥在還勝百花洲

江神子

建安縣戲
趙德莊

十年此地看花時醉題詩夜彈碁湖海相逢曾共惜芳
菲前度劉郎今度客嗟老矣鬢成絲江梅吹盡柳橋
西雪紛飛畫船移滿眼青山依舊帶寒溪往事如雲無
處問雲外月也應知

前調

金山
會飲

金銀樓閣認蓬萊曉煙開上崔嵬風引孤帆誰道卻船
回鵬翼倚天鰲背穩驚浪起雪成堆翩翩黃鶴爲誰
來醉持杯共徘徊四面江聲腳底隱晴雷織女機頭憑
借問何處更有瓊臺

滿江紅

丁亥示
龐祐甫

梅欲開時君欲去花誰同折應悵望江津千樹晚煙明
雪花似故人相見好人如寒鴈多離別待留君重看水
邊花花邊月臺城路山如闕追往事傷時節但春風
春雨古人愁絕多少揚州詩興在直須清夢翻蝴蝶問

他年誰記飲中仙花應說

前調

自鹿田山橋小集潛嶽寺坐中酬陳子象詞

寂寞山城春已半好花都折無奈向陰晴不定冷煙寒
食莫問花殘風又雨且須爛醉酬春色歎使君華髮又
重來人應識 丹井畔山橋側空翠裏煙如織便直教
馬上醉巾霑濕丞相車茵端未惜孟公好客聊為客算
明年溪路海棠開還相憶

前調

再至丹陽每懷務觀有歌其所製者因用其韻示王季夷章冠之

江繞層城重樓迴依然山色有佳人猶記舊家離別把

酒只如當日醉揮毫贖欠樽前客算平林有恨寄傷心
煙如織 湖平樹花連陌風景是光陰易歎新聲渾在
斷雲難覓暮雨不成巫峽夢數峯還認湘波瑟但與君
同看小槽紅真珠滴

水調歌頭

席上次韻 王德和

世事不須問我老但宜仙南溪一曲獨對蒼翠與孱顏
月白風清長夏醉裏相逢林下欲辯已忘言無客問生
死有竹報平安 少年期功名事覓燕然如今憔悴蕭
蕭華髮抱塵編萬里蓬萊歸路一醉瑤臺風露因酒得

全天笑指雲階夢今夕是何年

前調

七月六日與范至能會飲垂虹是時至能赴括蒼予以九江命造朝至能索賦

江路曉來雨殘暑夜全消人言天上今夕飛鵲漸成橋
杳杳雲車何處脉脉紅蕖香度瓜菓趁良宵推枕斷虹
卷撫檻白魚跳 五湖客臨風露倚蘭若雲濤四起極
目人世有煙霄我送君舟西渡君望我帆南浦明日恨
迢迢且醉吳淞月重聽浙江潮

前調

寄陸務觀

明月照多景一話九經年故人何在依約蜀道倚青天

豪氣如今誰在賸對岷峨山水落紙起雲煙應有陽臺
女來壽隱中仙 相如賦王褒頌子雲玄蘭臺麟閣早
晚飛詔下甘泉夢繞神州歸路却趁雞鳴起舞餘事勒
燕然白首待君老同泛五湖船

前調

次韻子雲惠山見寄

澌澌桂華滿搖落楚江秋去年今夜相望千里一扁舟
滿目都門風露離別淒涼幾度霜雪漸盈頭山水最佳
處常恨不同遊 少年約談笑事取封侯田園歸晚休
問適不用吾謀身外功名何處屈指如今老去無夢到

金甌賸買五湖月吹笛下滄洲

前調

水洞

今日我重九莫負菊花開試尋高處攜手躡屐上崔嵬
放目蒼巖千仞雲護曉霜成陣知我與君來古寺倚修
竹飛檻絕纖埃笑談間風滿座酒盈杯仙人跨海休
問隨處是蓬萊洞有仙骨巖落日平原西望鼓角秋深悲壯
戲馬但荒臺細把茱萸看一醉且徘徊

前調

雨花臺

澤國又秋晚天際有飛鴻中原何在極目千里暮雲重

今古長干橋下遺恨都隨流水西去幾時東斜日動歌
管萸菊舞西風江南岸淮南渡草連空石城潮落寂
寞煙樹鎖離宮且鬪樽前酒美莫問樓頭佳麗往事有
無中卻笑東山老擁鼻與誰同

前調

和麗祐甫見寄

落日澹芳草煙際一鷗浮西湖好處君去千里爲誰留
坐想敬亭山下竹映一溪寒水飛蓋共追遊況有樽前
客相對兩詩流笑談間風滿座氣橫秋平生壯志長
嘯起舞看吳鉤紅白山花開謝半醉半醒時節春去子

規愁夢繞水西寺回首謝公樓

醉蓬萊

次韻張子永同
飲謝德輿家

聽清歌初轉翠嶺雲橫乍飛還駐木落秋明正千巖呈
露況有賓朋飄然才調盡凌空鷓鴣步繞西疇同尋南
澗郊原新雨 好客聲名鄭莊風韻松菊栽成故侯瓜
圃燕去鴻來笑人生離聚老子偷閑愛君三徑共一樽
芳醕待約梅仙他年丹就騎鯨飛去

念奴嬌

中秋攜兒輩步月至
極目亭寄懷子雲兄

去年秋半正都門結束相將離別激激雙溪新鴈過重

見當時明月步轉高樓淒涼看鏡綠鬢紛成雪晚晴煙
樹傍人飛下紅葉 還記江浦潮生雲濤天際涌金波
一色千里相望渾似夢極目空山圍碧醉拍朱欄滿簪
丹桂細與姮娥說倚風孤嘯恍然身在瑤闕

前調

再用韻答
韓子師

定交最早歎西津幾度忽忽論別世事浮雲山萬變只
有滄江橫月長憶追隨湖山好處醉帽欹風雪竹陰花
徑興來題盡桐葉 誰憶此地相逢鬢毛君未白眉添
黃色屈指煙霄歸詔近路入龍樓金碧千載功名一樽

歡笑會作他年說倚天長劔夜寒光透銀闕

前調 次陸務觀見
貽念奴嬌韻

湖山泥影弄晴絲目送天涯鴻鵠春水移船花似霧醉裏題詩刻燭離別經年相逢猶健底恨光陰速壯懷渾在浩然起舞相屬長記入洛聲名風流腸詠有蘭亭脩竹絕唱人間知不知零落金貂誰續北固煙鐘西州雪岸且共杯中綠紫臺青瑣看君歸上羣玉

前調 又次
韻

春來離思正樓臺燈火香凝金戟楊子江頭嘶騎擁楊

柳花飛留客枚乘聲名謫仙風韻更賦長相憶酒闌相顧起看月墮寒壁樽前誰唱新詞平林真有恨寒煙如織燕鴈橫空梅蘂亂醉裏隔江聞笛白髮逢春湖山好在一笑千金直待君歸詔買船重話疇昔

水龍吟 溪中有
浣衣石

亂山深處逢春斷魂更入桃源路雙雙翠羽濺濺流水濛濛香霧花裏鶯啼水邊人去落紅無數恨劉郎鬢點星星華髮空回首傷春暮寂寞雲間洞戶問當年佳期何處虹橋望斷瓊樓深鎖如今誰住綠滿千巖浣衣

石上倚風凝貯料多情好在也應笑我卻怱怱去

前調

夜宿化城得張安國
長短句戲用其韻

五溪深鎖煙霞定知不是人間世
軒然九老排雲一笑
蒼顏相對星斗垂空月華隨步酒醒無寐
廣寒已近嫦娥起舞天風動搖丹桂
極目層霄如洗正千巖稜稜
霜氣飛泉半落蒼崖百仞珠翻玉碎
金衲松成葛洪丹
就如今千載歎謫仙詩在騎驢未遠且留君醉

瑞鶴仙

送王季夷

西風吹暮雨正碧樹涼生送君南浦
蟬聲帶殘暑滿高

林斜照暝煙橫渚故鄉路阻更秋入江城
鴈度悵天涯
幾許閑愁對酒共成羈旅
休問功名何在綠鬢吳霜
素衣塵土離觴緩舉收玉筋聽金縷
歎凌雲才調烏絲
欄上省把清詩漫與見洛陽年少交遊
倩君寄語

薄倖

送安伯弟

送君南浦對煙柳青青萬縷更滿眼
殘紅吹盡葉底黃
鷗自語甚動人多少離情樓頭水闊
山無數記竹裏題
詩花邊載酒魂斷江干春暮
都莫問功名事白髮漸
星星如許任雞鳴起舞鄉關何在憑高目盡
孤鴻去漫

留君住趁醑醺香暖持盃且醉瑤臺露相思記取愁絕
西牕夜雨

南澗甲乙稿卷七

南澗甲乙稿卷八

宋 韓 元 吉 撰

表

賀冊寶禮成尊號表

天地明察昭舜孝之無違日月光華慶堯齡之有永鴻
稱大備喜氣橫流臣聞極天下以事親斯啓安榮之運
本人心而御治茲爲仁壽之基洪惟慈闈膺萬歲之期
實繫聖君寵四海之化惟動丕應不顯其符隆大德必
得之名鏤彌文于寶謀紀泰元增受之策崇嘉號于法

宮恭惟皇帝陛下道際堪輿恩霑動植歡均海宇不遺
小國之臣禮盛天正亦尚一人之慶然而身濟大業躬
行至仁視膳問安匪徒區區曾閔之事勝殘去殺共推
赫赫禹湯之明是宜尼父之從心遂見周王之復古臣
屬嬰符竹阻望宸楓帝夢無疆豈但同符于文武邦儀
曠舉真成度越于漢唐

賀太上皇帝表

九州致養坐凝景命之申七政呈祥運格宸心之縱光
增典冊慶溢家邦恭惟尊號陛下若聖與仁能寬而惠

功成白水邁建武三十二年道備崆峒陋廣成千二百
歲脫屣萬機之重怡神五閏之餘宜膺睿算之無窮豈
視歷經而可紀神妃儷極共披金匱之書聖子當陽長
奉玉卮之壽臣屬拘職守阻造闕廷帝堯蕩蕩以難名
第切康衢之頌周王勉勉而壽考彌瞻雲漢之章

賀太上八十受尊號冊皇帝表

臣某言伏覩詔書加上光堯壽聖憲天體道性仁誠德
經文緯武紹業興統明謨盛烈太上皇帝壽聖齊明廣
慈備德太上皇后尊號冊寶者玉卮稱壽儼二紀之升

平寶冊增名伸兩宮之大慶禮嚴八秩歡動九圍臣聞
惟舜事堯斯啓髦期之社若文與武式彰夢帝之祥考
載籍之攸傳歷漢唐而未覩於昭聖代肆舉上儀一生
二二生三肇炎緒之符于有永萬取千千取百迪慈闈
之算于無疆一時並上于鴻稱嗣歲咸新于縟典恭惟
皇帝陛下系隆本始德邁永平涖中國而撫四夷將整
渭橋之駕坐明堂而朝羣后益表雲臺之功而乃襲龍
袞以下同老萊之衣調神鼎而躬致天下之養實爲盛
事彌介萬年臣屬領真祠阻趨觀闕福延宗社久知上

帝之顧歆惠及昆蟲更納斯民于仁壽

賀太上皇帝尊號表

臣某言伏觀詔書皇帝帥羣臣詣德壽宮

宋史高宗稱德壽宮

加上光堯壽聖憲天體道性仁誠德經文緯武紹業興
統明謨盛烈太上皇帝尊號者膺受命之符久熙神于
物外增泰元之策爰加號于域中掩載籍以彌高洽華
夷而共慶竊以期頤在宥自堯舜而有聞壽考逾中歷
漢唐而未見況脫屣而安天下之養垂衣而與造物者
遊王則次春御常珍于嗣歲孫又有子貽丕緒于本支

斯惟無得而名是爲必得其壽恭惟光堯壽聖憲天體道性仁誠德經文緯武紹業興統明謨盛烈太上皇帝陛下好生本天地之大德寔兵成帝王之極功三十六年躬行慈儉之寶萬有千歲力致太平之基宜典冊之屢書與皇圖而俱永臣欽奉盛際屬領外祠九賓臚傳雖莫奏甘泉之頌百神率舞第惟仰嵩嶽之呼

會慶節賀表

良月就盈夙啓誕彌之旦五星來聚聿迎元命之年宗社騰輝華夷協慶恭惟皇帝陛下恩沾動植道貫堪輿

體虞舜之無爲懋介兩宮之祉秉周文之至德益深四表之歡策增授于泰元禮獨行于昭曠本支百世已觀孫子之施壽考萬年將見帝王之冠臣久叨祠館阻造闕廷六樂成儀莫預鈞天之宴九賓在望第聞嵩嶽之呼

聖神出震凝寶命于昊天歷數紹堯啓昌辰于良月乾坤薦祉夷夏騰歡恭惟皇帝陛下大德好生休功不殺孝悌而光四海恭儉以屏五兵治格文明將繼六經而七祥開壽嘏允膺萬歲之三臣屬領祠庭阻趨觀闕雖

田穀之仰膏雨莫謝于生成若澤葵之傾太陽彌深于頌禱

神聖健生昭格熙平之運乾坤錫羨式彰震夙之辰海嶽騰歡華戎共慶恭惟皇帝陛下明並日月功光祖宗整法駕于園丘彌文嗣舉奉慶儀于前殿載籍未聞舊傳河水之清茲見壽星之會臣屬叨詞館遙睇闕廷莫陪嵩嶽之呼恭趨盛旦第切華封之祝益介萬年

千齡啓運於昭上聖之生萬歲成純式副下民之禱昆蟲闔澤海嶽歡呼恭惟皇帝陛下勇知表邦寬仁御世

體乾元之用九萬化默成法離照之繼明四方咸父候祥輝于良月增神筴以後天臣屬假麾符阻趨觀闕續天地之頌莫追考父之能賡立極之謠第切封人之願生商定位仰神聖之挺生日月光華驗基圖之復旦四方來賀萬國咸寧恭惟皇帝陛下陟禹之迹誦堯之言通孝悌于神明惟動丕應成安強于道德未占有孚載臨震夙之辰益著升平之象體太極之三爲一功卽混于華戎膺眉壽之萬有千治彌高于今古臣猥叨祠秩阻造廷紳擊壤歡呼第切康衢之頌稱觴忭舞如聞嵩

嶽之呼

昊天成命有開載夙之祥良月就盈益仰誕彌之節照臨所被鼓舞惟均恭惟皇帝陛下勇智以表萬邦神明而光四海政刑修于閒暇丕昭有截之威道德成乎安強共介無疆之壽茂建系隆之業聿臻恢復之期臣徒深望日之誠莫預造廷之慶紹登封之七十一俯觀世祖之成功膺歷數之萬八千仰繼天皇之盛際

占履武之祥序開良月紀流虹之旦慶及溥天莫測在宥之恩共上無疆之祝恭惟皇帝陛下丕承武烈重協

帝華修車馬以會東都聖功可待詰戎兵而陟禹迹德政用修洽四表之歡聲介萬齡之眉壽臣屬拘祠館阻造宸廷奉百末之觴魚龍在望上千秋之鑑葵藿傾心祥開良月占五星聚井之期慶浹寰區啓大電繞樞之旦乾坤丕應宗社延洪恭惟皇帝陛下睿智以有臨常德以立武會期長樂聿求萬國之歡獻獲大安坐式九圍之命懋建隆平之業於昭震夙之辰合二氣于無窮週三光而不老臣叨塵從橐久去宸廷履土戴天莫罄華封之祝望雲就日第增嵩嶽之呼

天申節賀表

宋史高宗生辰名天申節

紹炎圖于三紀久釋萬機嚴端節于千秋茂迎八秩祥
占嵩嶽喜溢康衢恭惟尊號德輔至仁功高再造怡神
物外自得逍遙之遊玩意域中不遺慈儉之寶仰聖子
神孫之共慶宜普天率土以均歡臣屬領真祠阻趨觀
闕候如復旦驗神光七十五來禮盛祈年頌眉壽萬有
千歲

中天紹復漢儀莫盛于兩京垂拱耆期堯壽特高于五
帝祥占星火喜溢康衢恭惟尊號道大難名功成不處
丕謨與子無憂直惟文王好生在民盛德孰加虞舜脫
屣萬機之外怡神四海之尊八千歲爲春坐溪河清之
運九萬里而上行觀輿地之歸臣久去班聯尚縻祠秩
仰房心之叶瑞莫遂窺瞻驗箕翼之齊輝第深忭舞
九州致養仰太極以居尊四表騰歡慶誕彌之紀節恭
惟尊號功成不宰道妙難名跡並商周茂建中興之烈
糝視堯舜獨全高蹈之風椿齡迎八秩之祥天壽啓萬
年之永臣叨塵從橐阻造宸廷驗火德之重明徒深猷
舞祝乾符之增授第切嵩呼

道契崆峒甫迪期頤之慶光凝華渚式昭載夙之祥燕
及敷天歡騰萬國恭惟尊號功高漢祖仁並唐堯踰建
武三十二年授之聖子迎天皇萬八千歲重見神孫倬
然壽考之符信矣古今之冠臣屬拘祠秩阻造闕廷出
丙入丁共仰星躔之極先庚後甲益知帝命之申

天命不顯其符久格系隆之運大德必得其壽式昭震
夙之辰夷夏均歡人神共慶恭惟尊號功超邃古治復
承平再造丕基陋漢唐其培塿允恭大業儷堯舜猶糝
糠方觀累洽以重熙自得長生而久視後乾坤而不老

膺歷數以無窮臣猥竊真祠阻趨宸陛仰鑄京之燕惟
深葵藿之傾聯嵩嶽之呼第切昆蟲之懌

進銀絹表

萬機脫屣仰崆峒訪道之辰四海貢珍盛華渚呈祥之
旦虔修方物恭寘大庭前件銀絹美異昆田實諸文篚
不腆敝賦敢爲宰旅之歸無疆惟休共上封人之祝

賀太上皇帝表

堯舜在上紹成復古之勲任姒比隆共格齊天之算禮
新一代慶洽萬方竊以日候再中故月承而有耀乾元

用九茲坤順以無疆仰泰皇迎增壽之祥乃柔極兆同
休之慶道均不老理合自然恭惟尊號太上皇帝陛下
脫屣怡神握符御世文王之與聖子既共保千鴻基帝
譽之有元妃宜並申于寶命肆差春旦繼舉盛儀靡煩
八駿之馳坐致七桃之獻臣屬嬰祠秩久去宸廷聽九
成之簫韶第想雲龍之會祝萬歲之眉壽徒殫葵藿之
誠

太上皇帝慶壽禮成賀表

慈闈介壽亘古未聞盛禮告成普天同慶恭惟尊號太

上皇帝陛下仁參高厚道冒華戎克遜成功父子自侔
于堯舜系隆底豫君臣未數于商周屬茲萬歲之期翕
受四方之賀啓祥輝于南極候淑氣于東郊不踰矩以
從心既驗降年之有永強爲名而字道益知受命之無
疆臣屬守蕃宣阻趨象魏歌卿雲之爛備聞海岳之歡
受神筴之增更仰日星之紀

皇帝賀表

慶集堯庭仰聖人之得壽禮行漢殿知天子之有尊宗
社增輝華夷受福恭惟皇帝陛下守先王之要道備中

國之至仁法地法天叶寧神于無外盡倫盡制極養志而不違當慈闈膺獻歲之祥實睿算擬傳家之喜占斗牛之王氣盛事冠于百王會日月于壽星歡聲騰乎四表臣適叨郡寄阻望國光莫陪洛下諸生作受命中興之頌尚與海隅父老詠蒸民立極之詩

太上皇后七十賀皇帝表

千齡紀運式昭帝載之隆七秩迎年更上母儀之慶歡騰海宇喜溢宮庭竊以漢興而尊太公媪后不書于長樂堯老而授大舜女皇莫著于平陽惟一時並養于宸

闈且二聖聯躋于睿算在今甫見亘古未聞恭惟皇帝陛下齊日月之運行事天地以明察垂衣拱手而致化道嘗合于兩儀問安視膳于無違教旣刑于四海金簡同開于壽歷玉卮益奉于慈顏臣逖遠從班欽聆盛典宴西池而歌黃竹小融融洩洩之詩禮南岳而倡卿雲美蕩蕩巍巍之治

孝慈淵聖皇帝上僊慰表

代倉司

佳兵罷警方期鑿輅之還遠使來庭遽告龍髯之斷哀纏宸極痛浹寰區伏以孝慈淵聖皇帝潛德春宮天下

陰受其賜承休寶位生民無得而稱蓋仁孝本于自然
慈儉存于先務蒙塵三紀阻覲萬方合文王之明夷固
已行乎患難有高宗之無逸曾未享于春秋恭惟皇帝
陛下坐致平康躬修悌順東朝違養纔歲月之僅周北
顧在原何禍災之荐至音容遂邈聖情難居臣適以使
事在遠不獲奔赴闕廷云云

太上皇帝慰表

中壺貽災遽失婦容之順慈闈軫念諒同子聖之悲恭
惟光堯壽聖太上皇帝陛下脫屣萬機頤神四表雖自

家刑國宜俯記于內朝而制禮緣情願稍寬于聖慮

太上皇后慰表

母道遵臨方嚴慶養婦儀龜隔遽軫慈懷恭惟壽聖太
上皇后殿下厚德承乾至明儷日顧徽音之欲嗣悵柔
範之莫還願寬中節之哀以副從宜之禮

皇帝慰表

為皇后
上仙

災延椒掖悲動楓宸凡在照臨舉深愴慕伏以大行皇
后化行恭儉德茂柔嘉正九御之盛儀悵焉未久助兩
宮之大養俟爾不終恭惟皇帝陛下治極寧親功深御

宇願抑俛天之感俯從率土之祈

又爲皇太子薨

前星失次少海沈輝痛極本支悲纏寰宇恭惟皇帝陛下治功日起齒德天開宮掩長秋顧哀悼之未遠苑空博望乃變故之荐臻願思付託之隆少抑哀慈之念

太上皇帝慰表

國有神孫方啓重輝之盛天開聖緒乃貽大本之憂恭惟尊號備王者之無私膺天下之至養甲觀占夢茂迎四世之祥綠車在廷遽有一朝之感願益觀于道化庶

少抑于聖情

太上皇后慰表

主器占憂遂虛儲禁含飴興起倍軫慈衷恭惟尊號體備仁榮躬行儉實眷此重明之照夙昭大慶之符帝祉未施天災遽有願抑悲思之感益綏壽履之康

知婺州到任謝表

入塵法從歲躔悅閱于再周出假便蕃道路僅更于數舍仰體曲成之眷敬宣寬大之恩伏念臣知力不能踰人學術無以異衆才疎意拙少嘗粗志于功名心折氣

摧晚實重傷于憂患豈謂衰頹之朽質寢蒙特達之聖
知始寓直于掖垣旋參華于選部文惟翫馘屢承褒袞
之加議本慙愚悉荷威顏之假感洪慈之未報揣微分
而敢安顧此東陽今爲輔郡財殫粟匱適遭饑饉之餘
訟劇政繁尤重藩宣之委孰云孱懦可副選掄此蓋恭
遇皇帝陛下躬慈儉以保邦體寬仁而御下謂臣早更
州縣或知撫字之方憐臣久侍禁嚴備識憂勤之意賁
之列職寵以分符敢效昔賢樽俎但期于賦詠庶幾漢
吏里閭稍遂于奠安

再知婺州到任謝表

冠西清之美職已冒殊恩分太末之名邦仍叨舊治稍
違行闕卽屆部封伏念臣少嘗竊慕于古人晚始親逢
于聖主豈謂迂疎之質遂蒙特達之知造膝而貢狂愚
旣屢嘉其一得披肝而導志慮曾何補于萬分罔知歲
月之遷寢荷寵靈之異昨膺召節誤長從班孰云銓敘
之平益愧論思之謬葵藿徒知向日忍負寸心犬馬猶
有戀軒敢懷去意第每虞于譏議仍滋懼于滿盈自詭
爲州實惟報上況滋寶婺特近太微地竊重臨治行靡

追于黃霸時客著詠郊居肯慕于沈侯祇佩眷私若爲稱塞此蓋恭遇皇帝陛下德參天地道冒華戎泰和在于唐虞肅臣工而器使仁風慰于黎庶擇守令以布宣施及妄庸荐加優渥臣敢不恪求民瘼寅奉藩條官聯喉舌之司顧敢忘于左右郡亦股肱之寄誓益告于謀猷

謝賜寬恤手詔碑表

宸恩寬大衣被于羣黎睿藻昭回照臨于萬寓承休甚寵拜命惟新竊以方國賜書本建武中興之盛事爲民

下詔實孝文務養之深仁於鑠聖時兼休二代恭惟皇帝陛下道侔天地德紹祖宗功烈無前孝治驩騰于四表嘉祥荐至豐年屢格于萬邦憫茲穀賤之或傷尙致戶輸之過取賜頒寶墨申戒攸司粲然雲漢之垂穆若春陽之布臣濫紆州組躬受詔函周賦有常詎敢多于什一堯言在上庸知告以再三

辭知建寧府表

右臣准尚書省劄子十二月三日三省同奉聖旨差臣知建寧府不候授告疾速前去之任候任滿前來奏事

者臣欽聞成命愧懼無任伏念臣以至愚極陋之質荷
上聖特達之知擢寘三銓已乏論思之效試守一郡迄
無善最之稱徒知奉行寬大以拊摩饑饉之餘不慮自
貽曠瘵而招致悔尤之積懇祈散地實微分之攸宜以
畀便藩匪私心之敢望況建寧之鉅鎮本潛躍之名區
雖異時嘗叨宰字之官豈今日遂有鎮臨之幸已試無
狀啓處不遑伏望皇帝陛下遴選循良布宣德意俾內
外咸舉其職思小大務盡其才寵以真祠庶少安于庸
孺假之歲月斯曲示于保全臣無任瞻天望聖激切屏

營之至所有恩命未敢祇受臣除已交割婺州職事以
與次官一面起離前去衢信州聽候指揮外謹錄奏聞
伏候敕旨

知建寧府到任表

瀝懇籲天莫遂請閒之願疏恩易地仍叨共理之榮優
假至深凌兢罔措伏念臣奮身疎遠遭世盛明入參侍
從之華每蒙異眷出領藩宣之寄曾乏微庸況歲月之
僅周積過愆而靡追孤蹤易毀寧分近甸之憂全度兼
容特畀潛藩之重眷茲建水實控閩陬代藉初基覺谿

山之改觀宦游寢老慨民社之嘗臨雖馳驅頗愧于壯年然委付有光于前日此蓋恭遇皇帝陛下惠綏羣獻明燭高微器使人才舉絕重輕之弊衡持天下悉無內外之殊不遺管蒯之微尚費乾坤之造軫其迂鈍錫以便安臣敢不仰體曲成益思盡瘁土風未俗猶粗識其二三利澤深仁或布宣于萬一

謝降官表

外臺撫戾難追于深文中詔施仁第從于寬典恩隆命薄感極涕零伏念臣猥以庸材叨塵輔郡野無青草適

歲事之荐饑戶有犀渠復土風之善競慨疲鴛之旣竭慚尺寸之罔功財貨未贏陽城之政甚拙教條靡善延壽之過自知至于報應或繆于文移請讞務伸于法令重貽刺舉宜在譴訶羸瓶之寘井涓蓋有擠而甚者弊車之避道左是宜麾而去之敢期覆燾之深曲示保全之厚就移職守特損官聯此蓋恭遇皇帝陛下湯網務寬舜璣惟察念臣久更州縣常自信其迂愚憐臣昔侍禁嚴每洞知其拙直刑于善貸責以後來臣敢不仰副殊私益堅素履雖桑榆之收暮景莫知補報之方若葵

南浦日之稱
卷八
三吳舒帷校
藿之傾太陽尚有糜捐之所

謝放罷表

彈文甚峻請從流放之科宸度兼容聊示汰歸之譴恩
深命薄感激涕零伏念臣猥以非才叨塵異眷文詞淺
拙嘗蒙甚善之褒議論闊疎屢動蓋高之聽久冒清華
之選皆繇特達之知昨自典銓復求試郡與之舊治曾
無數舍之勞詎以字民尚乏期年之効徒以世霑厚祿
身忝從班稍知粗抑于豪強不敢遽形于退避明目張
膽期法令之是行銷骨鑠金乃謗傷之遂積果貽清議

上負明時然臣被拔擢于州縣者餘二十年荷委任于
朝廷者更十數職寵為過分嗟有識之自知貪以徇私
憊無從而可辨儻匪皇慈之洞鑒詎容小己之保全茲
蓋恭遇皇帝陛下擴博愛之深仁推好生之盛德惟天
為大徧覆包涵而靡遺如日之升遠近幽深而必照察
臣性本于疎直憐臣夙勵于樸忠不忍嚴誅尚存善貸
臣敢不洗心念咎銘骨知歸迫暮景之桑榆若為報國
視歲寒之松柏所以事君

謝提舉太平興國宮表

竊輔郡之符自貽謗戾賦真庭之祿俾追飢寒滋佩恩
憐徒深感涕臣某誠惶誠懼頓首頓首伏念臣學知爲
己仕切慕君荷聖神識拔于衆人之中遭逢特異躡侍
從周旋于六官之長忌嫉已多惟思樸直以盡忠詎敢
窺覷而幸進竭因請外復玷承流謂抑強禁暴者刺史
之常規若避事懷私者古人之深恥豈慮中傷之銖積
遂能搖動于風聞含沙幾類于短狐射市乃遭于強弩
誣其怨望固已墜臣于深淵竊以貪汙直欲錮臣于聖
世賴至仁之在上知羣下之隱情洞見肺肝保全軀命

然臣恐懼閱三時之久羈窮懷十口之憂未容放跡于
山林但有投誠于君父函蒙鴻造肆軫餘生縻廩稍于
安閒貸馳驅于衰病茲蓋恭遇皇帝陛下曲成萬物懷
保小民力辨忠邪益恢張于治具大明黜陟庸丕變于
士風將尋尺之有施示蓋帷之罔棄察其既往許以自
新臣敢不砥礪素衷激昂晚節無功而祿第爲餬口之
羞有命不渝尙切粉身之報

再任興國宮謝表

綴西清學士之班尙叨美職賦南紀祠官之祿益愧罔

功祇荷恩憐莫知報塞伏念臣才爲短拙分實羈單圭
寶華門竊有棲遲之幸竹筥木屐自嗟嫁送之頻顧榮
遇之已多曾生涯之未給一昨坐謾于郡寄繼蒙予食
于真遊抱詩禮以傳家詎忘所守課蠶鹽而玩歲僅活
其孥逮茲秋滿之初復起年饑之慮飛而控地志宜遂
于歸田窮則呼天心但祈于雨粟果勤洪造仍畀素餐
茲蓋恭遇皇帝陛下德本好生治先從欲體成周之歸
厚草木依仁法炎漢之用寬昆蟲咸懌肆紆臨照施及
安庸臣敢不奮厲愚衷激昂晚節枯魚未朽旣均被于

斗升老馬載馳或粗知于道路

三任興國宮謝表

謏材無用祇退伏于田廬明命有加乃荐叨于祠館荷
天從欲揣分興慚伏念臣頃以戇愚誤蒙選拔典領三
銓之重詎罄論思蕃宣兩郡之繁遽貽譏議一去闕廷
之下六驚歲月之遷載益曷望于層霄徒懷眷遇伏櫪
自甘于末路倍費保全惟負郭之未充慨投簪之甚迫
尚縻廩稍獲在安閱得象罔之珠益知味道受支離之
粟滋愧匪功茲蓋恭遇皇帝陛下仁覆羣生春熙庶彙

南清日乙和
卷八
謂臣早更州縣宜膂力之瘳愆憐臣久侍禁嚴亦姓名
之屢記肆加存拊俾道飢寒臣敢不思報厚恩誓殫晚
節餘生永泯儻爲尺蠖之伸素志僅酬或致寸莛之効

江東轉運判官謝表

竊食無功久尸于宰掾便私有請尙畀于使輶祇屆部
封具宣詔旨伏念臣零丁墜緒歷落凡材一趨君璽之
嚴五閱歲曠之換爲郎甚寵乃官謗之自貽去國稍淹
迄州符之未試曲荷乾坤之造再瞻日月之光南省西
樞之聯曾微報効中臺右轄之屬荐至攝承揣分輸誠

拜恩從欲策名中秘之府錫節大江之壩地接行畿實
總陪都之調度跡違文陛重勤睿訓之丁寧此蓋恭遇
皇帝陛下天覆堯仁日躋湯聖衡持內外初無彼重而
此輕器使賢愚靡間寸長而尺短治厲精而匪倦功復
古之是圖致此妄庸姑從寄委臣敢不益堅素守無負
聖知雖攬轡登車未究昔人之志儻給軍轉漕或殫異
日之能

謝起軍轉官表

羽檄調兵僅供常職綸言錫命乃沐異恩悵懇避之不

俞第祇承而爲愧伏念臣猥以頑冥之質誤蒙神聖之知入侍禁塗豈有論思之效出分藩服曾何善最之稱當周王田獵以選師仰漢帝璽書而賜郡元戎十乘奉追召之旣嚴次國二軍觀驅馳而敢後亦妄陳于末議竊自獻于愚忠深懼譴訶詎宜褻陟披肝瀝膽謂有願之必從縮頸汗顏迄無功而受賞此蓋恭遇皇帝陛下激昂士氣砥礪臣工陰闔陽開務作新于庶政乾旋坤闢思底定于萬方致茲增秩之榮靡間尸官之濫臣敢不欽承訓飭彌謹蕃宣躬阡陌勸農桑益布維新之令

修車馬備器械庶觀復會之期

謝除待制表

分符出守已叨便近之藩錫命寵行尚綴禁嚴之列懇辭莫遂跼受彌兢伏念臣久以庸愚誤蒙簡拔周遊省戶參掾屬者九年密勿從班備銓衡于兩選積有丘山之厚戾了無塵霧之微勞外并名州實踰分願中聯美職滋冒恩榮况然未定之驚魂甚矣橫流之感涕茲蓋恭遇皇帝陛下仁如天大德與日升器使羣材管蒯盡歸于採掇生成庶彙蟲魚咸遂于飛潛曲示眷私用光

臨遣臣跡雖違于丹陛名猶濫于清廂惟近臣獻納之私未殫于補報若刺史中和之布敢負于使令

除龍圖閣學士謝表

冒三銓之長久玷近班首六閣之聯遽叨美職恩踰意表愧溢顏間臣某誠惶誠懼頓首頓首竊以入從出藩本侍臣之常禮循名責實斯主上之至權逮夫寵數之驟加必有勞能之可紀仰河圖于東序是惟冠百世之彌文通禁橐于西清必以待一時之舊老如臣者少而孤陋晚益顛冥符節屢頒久載馳于周道玦環遞賜悵

幾入于修門未酬神聖之知竊有滿盈之懼茲由常伯自詭便藩綸命高華豈謂疏榮之特異奎躔炳耀殊非避寵之能安此蓋恭遇皇帝陛下湯聖日躋堯仁天覆察臣持循法令粗知課力之方俾臣宣布詔條曲示臨民之渥顧此鸞鳩之質曷窺龍馬之光臣敢不被飭慚衷容揚隆施官雖外服尚司寶禁之儲名在諸儒敢忘論思之報

權吏部侍郎謝表

服勤公掾濫一官四至之榮列職禁塗積十載九遷之

幸拜恩逾厚揣分奚宜伏念臣仕本慕君學知爲已守高曾之規矩嗟涉世以自疎聞師友之淵源慨決科而已繆一從縣宰誤玷王官夤緣寢歷于省臺出入薦叨于符節微軀欲奮幾成控地之鳩弱羽易摧屢作退風之鷁矧憂患支離之後荷生成收召之殊兩轄重陪豈有彌綸之効西垣暫直曾何潤色之工方虞未免于譴訶敢意遽蒙于簡拔惟茲選部實異他曹內以檢制于吏奸外以整齊于士類當劇煩而罔避匪庸懦之所堪此蓋恭遇皇帝陛下天覆函生日熙庶政賢者在位而

能者在職舉無棄于羣材仕者欲朝而農者欲耕俾各安于至化眷茲銓敘之職責其愚鈍之功臣敢不三沐自修百爲盡節若課吏期于平允可無衡鑒之功而從臣許以論思尚切涓埃之報

除吏部侍郎謝表

典銓無補每懷代匱之憂拜命有加乃冒爲真之寵伏念臣愚不更事老無取材用意闊疎最出衆人之後秉性樸直但期聖主之知自擢貳于銓衡實坐縻于歲月威靈遠被僅揚使者之旌職業空居猶竊從臣之橐本

虞曠戾敢冀恩榮此蓋恭遇皇帝陛下丕冒華戎裁成
品彙謂上策莫如自治將內外以舉安思衆賢聚于本
朝故涓埃之咸取顧嗟庸懦亦在褒陞臣敢不仰體至
仁誓堅素履惟守資格而師法令罔敢怠違若殫忠盡
而罄論思是爲報塞

郊赦加食邑謝表

禮行郊報初莫預于駿奔恩衍戶租乃重沾于惠術叨
榮逾厚揣分知慚伏念臣久去班聯尚尸祠祿材能素
謏了無橫草之功齒髮寢彫第有守株之志莫致慶成

之善頌遂膺進律之殊褒駢邑旣增取禾興愧此蓋恭
遇皇帝陛下化參天地道通神明方萬歲以成純躬致
嚴禋之祀靡一夫之不被益均臣庶之歡申賁絲綸用
彰典禮臣敢不誓圖報稱欽佩眷慈縱觀渭上之朝詎
忘異日獨抱周南之病自信餘生

謝進封潁川郡公加食邑實封表

慈皇介壽霈及敷天微臣何功例叨進律仰止王言之
賁遽躋公社之榮伏念臣材不逮中愚無所用蚤蒙異
擢詎忘補報之階自取謗傷尚竊安閒之祿方舜治格

無爲之盛乃堯齡臻難老之期千歲有逢萬邦胥慶錫爵遂超于五等疏封且冒于冬田茲蓋恭遇皇帝陛下老老以興民君君而賦政盛禮備樂成儀煥于兩宮宥罪薄征懽聲溢于四表慨茲朽質曷副深仁臣敢不誓罄丹誠恩酬洪造老當益壯况懷伏櫪之心用之則爲益勵守株之志

謝加食邑實封表

臣某言伏准告命以明堂大禮慶成加臣實邑三百戶食實封一百戶臣已望闕謝恩祇受訖者禮行泰室曾

莫預于駿奔賞逮羣工乃例霑于惠術人微曷稱恩重莫酬伏念臣久玷從班尚叨祠祿散材無用自甘屏跡于丘園盛典有光豈復相儀于禮樂解澤旣敷于溥率歡聲實徧于邇遐未嘗趨造于朝猶蒙多與之邑茲蓋恭遇皇帝陛下日新聖德天覆萬方弗遺小臣欲賢愚之並施爰有大賚俾動植以知仁臣敢不誓竭疲庸仰思報塞三百戶而無肯足增寒陋之華八千歲以爲春但祝聖神之壽

代賀南郊禮成表

泰壇修報寶歷迎長惠浹百神歡均四海恭惟皇帝陛下仁如天地德類祖宗年穀屢豐馨香薦于至治禮樂大備形聲協于泰和惟茲上帝之博臨式見聖人之能饗合祿允塞益顯從周之文並侑孔嚴光昭復禹之盛臣屬叨假節阻預奉璋聆熙事之備成惟深忭舞布詔書之寬大彌切欽承

代施資政謝靜江府到任表

擢從祠館就領帥符恩許自新顧馳驅之敢後榮踰始望徒跼踖以靡遑已見吏民具宣詔旨伏念臣性資凡

陋術業空疎比叨預于政機迄無裨于國論老將耄及寧逃負乘之譏福過災生積有素餐之戾曲荷乾坤之造尚寬鈇鉞之威竊食投閒慨驚魂之未定銜恩起廢悅神觀以俱還惟茲八桂之封外控百蠻之壤奉琛面內廟謀方事于綏懷剖竹臨邊開寄益資于鎮撫豈翳衰鈍可副使令茲蓋恭遇皇帝陛下大度兼容至明洞照任賢而福天下邁成湯選衆之仁進德以尊朝廷迪虞舜知人之哲洪啓同寅之治聿求共理之良臣敢不仰體眷慈誓殫綿力雖聽風觀化未能追循吏之規而

省事清心亦足示遠人之意

代江南提舉范直閣謝到任表

千里造朝方蒙于收召十城命使遽玷于光華已居部
封恭宣詔旨伏念臣起家寒遠涉世迂疎一昨造跡于
書林屢嘗賜對于便坐身逢聖主每懷造膝之忠意忤
權臣幾致反唇之罪三祈閒館兩左遐州幸公道之復
開獲清光之再覩愚衷自勵雖知僅免于悔尤舊學寢
荒豈有發明于議論敢期齒獎曲賜眷憐寵之內閣之
名付以外臺之寄人微恩厚感極涕零此蓋伏遇皇帝

陛下懋建大中敷求至治乾綱獨運節萬務以鼎新離
照無私萃羣材而器使致茲庸瑣亦誤選掄臣敢不深
究貨源持平廩政雖激濁揚清之事職所願爲若奉公
守正之心義當無替

代劉給事謝復祕閣修撰致仕表

竊食真祠久逼桑榆之暮拜恩內閣遂榮出里之歸揣
己踰涯荷天從欲伏念臣奮身寒遠賦分奇窮從六藝
以決科僅而得仕接諸儒而奏技晚特逢時頃繇憲府
之聯獲冒書林之選螭螭載筆嘗預記于王言鳳閣判

南浦日之私
卷八
吳舒帷校
花復濫司于帝制進膺瑣闥數侍清光乃遽速于顛隳
迄自投于閒散鄉閭作佚旣閱十年香火無功殆逾數
任惟是衰殘之質寢登耄耄之期力已弗仕無復爲駒
之意老將奚道徒懷化鶴之悲祇育布其腹心庶自乞
其骸骨豈期睿眷特賁殊私稍還論述之名俾識退休
之寵義兼念舊恩出再生茲蓋恭遇皇帝陛下簪履興
慈蓋惟示軫欲曲全于小物肆紆照于容光謂臣麋鹿
之姿豈軒裳之是適憐臣犬馬之齒曾鐘滿之幾何許
以博家尙爲報國臣敢不効忠自勗守道弗渝擊壤而

歌唐虞預識豐年之瑞閉門而詠周孔益知化日之長

代徐侍郎謝宮祠表

典銓法從久廢竊位之羞賦祿真祠更遂養疴之請恩
輝逾厚感涕何言伏念臣性本闊疎才仍淺陋早緣執
戟不爲當路之容晚預賜環最取衆人之後使北庭于
將變持漢節以僅還擢副民曹顧已亡于善狀易司吏
選曾不畏于多言徒知肝膽之欲輸豈謂筋骸之難強
衰頹彌甚疾發動者兩三災患相仍意不如者七八雖
際飛龍之運自甘退鷁之蹤尚軫皇慈曲從私志旣假

珍臺之佚復聯書殿之榮此蓋伏遇皇帝陛下德合無私功存善貸擴大明于日月獲望清光拯微命于風波少安散地示蓋惟之罔棄俸棧豆以知歸臣敢不益佩弦韋自親藥石老馬或知于道路固絕望于馳驅犁牛無用于山川第服勤于耒耨誓堅晚節靡墜素風

牋

太上皇后賀牋

臣某言伏觀詔書光堯壽聖憲天體道性仁誠德經武緯文紹業興統明謨盛烈太上皇帝聖壽八十皇帝帥

羣臣詣德壽宮加上壽聖齊明廣慈備德太上皇后尊號冊寶者聖皇紀壽益上萬年之期神母齊徽方隆四海之養禮行當宁慶及敷天恭惟壽聖齊明廣慈備德太上皇后殿下厚德承乾柔明媿日邁周郊之胥宇輔成再造之功踰漢掖之練衣同膺難老之貺載申顯號允屬昌辰日居月諸共仰西池之宴天明地察更占南極之祥臣濫秩祠官叨趨魏闕觀大父母人倫夙正于乾坤有聖子孫國祚永符于箕翼

皇后賀牋

臣某言伏觀詔書加上太上皇后尊號冊寶者慶集親
庭掩漢唐之盛事祥開壽歷紹堯舜之高年喜溢寰區
光生典冊恭惟皇后殿下化行恭儉德茂慈仁肅陰教
于中闈會朝惟謹奉常珍于西內左右無違穆卜柔神
助成緝禮施于孫子嚴青宮而致綠車之遊燕及皇天
贊玉卮而集瑤池之上臣猥叨祠秩阻綴廷紳稱萬歲
之觴重霄在望仰三朝之會率土馳誠

代湯丞相母夫人賀中宮牋

迎嗣歲之嘉祥母臨萬國正長秋之顯號婦順兩宮喜

動宸闈歡均寰宇恭惟皇后殿下體參坤厚德配離明
慶久襲于勲闕本塗山之自出譽夙彰于朱邸符媯汭
之來嬪果覲禕衣進膺寶冊奉燕禔之文羈宜百斯男
躬璽館之懿箱俟三之日妾叨榮盛際就養私庭王化
所基方仰自家而刑國人倫既正敢忘教子以事君

南澗甲乙稿卷八



